

MESYUARAT KETIGA, PENGGAJAL KETIGA  
PARLIMEN KEEMPAT BELAS  
2020

**HARI KHAMIS : 19 NOVEMBER 2020**

**JAWAPAN-JAWAPAN BAGI PERTANYAAN-PERTANYAAN JAWAB**  
**LISAN YANG TIDAK DIJAWAB DI DALAM DEWAN**  
**( SOALAN NO. 10 HINGGA NO. 49 )**

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**  
**DARIPADA : TUAN NGA KOR MING [ TELUK INTAN ]**  
**TARIKH : 19 NOVEMBER 2020 (KHAMIS)**

**SOALAN**

Minta **MENTERI PENGAJIAN TINGGI** menyatakan adakah Kementerian bersedia memansuhkan Akta Universiti dan Kolej Universiti yang menzalimi pimpinan mahasiswa yang lantang bersuara.

**JAWAPAN**

**Tuan Yang di-Pertua,**

Akta Universiti dan Kolej Universiti 1971 (Akta 30) [AUKU] telah diwartakan pada 30 April 1971 dan merupakan akta induk bagi maksud menubuh, menyelenggara dan mentadbir universiti dan kolej universiti awam di Malaysia. Selain daripada perkara berkaitan pelajar, kandungan utama AUKU turut merangkumi hal berkaitan kawal selia dan tadbir urus universiti, seperti punca kuasa penubuhan, lembaga pengarah universiti, kuasa universiti dan perlembagaan universiti.

Kementerian sentiasa prihatin dan responsif ke atas aspirasi pelbagai pihak yang inginkan AUKU ditambah baik dari semasa ke semasa. Atas dasar inilah, AUKU telah mengalami proses pindaan sebanyak tujuh (7) kali sejak ia diwartakan pada tahun 1971 hinggalah pindaan terakhir pada tahun 2019.

Pindaan pada tahun 2012 misalnya, telah membolehkan mahasiswa menyertai kegiatan parti politik di luar kampus, manakala pindaan pada tahun 2019 pula telah memberikan kebebasan kepada pelajar menyertai aktiviti parti politik di dalam kampus. Kedua-dua pindaan ini boleh dianggap sebagai pindaan yang paling signifikan ke atas kebebasan berpolitik pelajar di kampus.

Usaha berterusan masih dilaksanakan oleh pihak kementerian bagi menambah baik AUKU mengikut keperluan semasa. Sebuah Jawatankuasa Kerja Penambahbaikan AUKU telah ditubuhkan pada bulan September 2020 untuk meneliti secara menyeluruh penambahbaikan yang boleh dilaksanakan supaya AUKU sentiasa relevan dengan kehendak semasa. Keahlian Jawatankuasa ini terdiri daripada pakar perlembagaan, pakar sektor pendidikan tinggi, wakil pengurusan tertinggi universiti, wakil persatuan dan NGO serta wakil pelajar. Apa jua tindakan yang akan diambil oleh kementerian, ianya berlandaskan hasrat untuk melahirkan mahasiswa yang dinamik, peka dan prihatin ke atas isu kenegaraan dalam usaha mempersiapkan mereka menjadi pemimpin masa hadapan.

Sekian, terima kasih.

**PEMBERITAHUAN PERTANYAAN DEWAN RAKYAT MALAYSIA  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : TUAN RAMLI BIN DATO' MOHD NOR  
[CAMERON HIGHLANDS]**

**TARIKH : 19 NOVEMBER 2020 (KHAMIS)**

**SOALAN**

minta **MENTERI PEMBANGUNAN LUAR BANDAR** menyatakan adakah pihak Kementerian bercadang untuk meneruskan projek menaik taraf jalan pedalaman dari Pos Betau ke Pos Lenjang kepada Fasa Kedua iaitu dari jajaran Pos Lenjang ke Pos Titom.

**JAWAPAN**

Tuan Yang di-Pertua,

Projek pembinaan jalan di pedalaman negeri Pahang dari Pos Betau ke Kampung Simoi (15.22km) telah dilaksanakan oleh ICU, Jabatan Perdana Menteri pada tahun 2020 dengan pelantikan JKR sebagai Agensi Pelaksana.

JAKAO akan meneruskan kesinambungan projek tersebut dalam Rancangan Malaysia Ke-12 iaitu dari Kampung Simoi ke Pos Lenjang sejauh 20km. Permohonan ini telah dikemukakan kepada EPU pada April tahun 2020 untuk memulakan pelaksanaan projek pada tahun 2021.

Seterusnya fasa kedua iaitu jajaran dari Pos Lenjang ke Pos Titom dijangka akan dilaksanakan pada akhir RMKe-12 iaitu selepas projek jalan Kampung Simoi ke Pos Lenjang disiapkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK ROZMAN BIN ISLI [LABUAN]**

**TARIKH : 19 NOVEMBER 2020 (KHAMIS)**

**SOALAN**

**DATUK ROZMAN BIN ISLI [ LABUAN ]** minta **MENTERI KEWANGAN** menyatakan adakah menteri sedar bahawa syarikat-syarikat yang berdaftar dengan Labuan FSA dari kategori '*General Trading and Services*' sekarang selepas '*Economic Substance Requirement*' (ESR) dilaksanakan terkeluar dari senarai jadual '*Labuan Business Activity Tax Act 1990*' (LBATA). Padahal kategori yang sama adalah layak untuk masuk jadual tersebut di '*jurisdictions*' lain. Ini menyebabkan sekarang syarikat-syarikat antarabangsa tersebut dikenakan '*income tax*' antara 17% ke 24% bukan lagi 3%. Perkara ini sangat '*urgent*' untuk dibetulkan.

**JAWAPAN**

**Tuan Yang di-Pertua,**

Untuk makluman Ahli Yang Berhormat, bermula 1 Januari 2019, entiti Labuan yang ingin menikmati kadar cukai keutamaan, atau dengan izin *preferential rate*, untuk aktiviti perniagaan di bawah Akta Percukaian Perniagaan Labuan (LBATA) 1990 perlu mematuhi syarat substantif iaitu mempunyai pekerja sepenuh masa di Labuan dan perbelanjaan operasi tahunan di Labuan seperti yang ditetapkan dalam Peraturan-Peraturan Cukai Aktiviti Perniagaan Labuan (Kehendak Bagi Aktiviti Perniagaan Labuan) 2018. Syarat substantif ini diperkenalkan bagi memastikan Malaysia mematuhi piawaian antarabangsa yang telah ditetapkan untuk aktiviti perkhidmatan yang bersifat *mobile geographically* bagi menyokong kemasukan pelaburan asing.

Peraturan yang ditetapkan ini diperkemas dan diperkasakan dari semasa ke semasa bagi memastikan hanya aktiviti yang memfokuskan kepada aktiviti berkaitan Pusat Perniagaan dan Kewangan Antarabangsa di Labuan diberikan kadar cukai *preferential*, dengan izin, serta bagi mengelak pertindihan insentif cukai yang ditawarkan di bawah Akta Cukai Pendapatan 1967.

Pada masa ini aktiviti *general trading and services* dengan izin **tidak** dimasukkan sebagai salah satu aktiviti Labuan kerana aktiviti ini tidak termasuk dalam kategori Pusat Perniagaan dan Kewangan Antarabangsa. Namun, aktiviti ini ada ditawarkan galakan cukai di bawah Akta Cukai Pendapatan 1967 iaitu Hab Prinsipal dan Syarikat Perdagangan Antarabangsa Malaysia.

Sekian, terima kasih.

**PEMBERITAHUAN PERTANYAAN DEWAN RAKYAT MALAYSIA  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : DATUK HAJAH AZIZAH BINTI DATUK SERI  
PANGLIMA HAJI MOHD DUN [ BEAUFORT ]**

**TARIKH : 19 NOVEMBER 2020 (KHAMIS)**

**SOALAN**

minta **MENTERI PEMBANGUNAN LUAR BANDAR** menyatakan jumlah berserta lokasi yang telah dilaksanakan Projek Bekalan Air Luar Bandar (BALB) dan Bekalan Elektrik Luar Bandar (BELB) di Sabah.

**JAWAPAN**

**Tuan Yang di-Pertua,**

Untuk makluman Yang Berhormat, di bawah pelaksanaan Bekalan Elektrik Luar Bandar (BELB) Negeri Sabah, sebanyak 15 buah projek telah dilaksanakan dalam tempoh lima (5) tahun di bawah RMKe-11 dengan kos keseluruhan projek sebanyak RM3.06 bilion dan memberi manfaat kepada 9,588 buah rumah di pelbagai daerah di Negeri Sabah.

Bagi Bekalan Air Luar Bandar (BALB) Negeri Sabah, sebanyak 63 buah projek sedang dilaksanakan oleh Kementerian dengan kos keseluruhan sebanyak RM2.04 bilion dan memberi manfaat kepada 34,078 buah rumah.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : TUAN CHAN FOONG HIN  
[KOTA KINABALU]**

**TARIKH : 19 NOVEMBER 2020 (KHAMIS)**

**SOALAN**

**TUAN CHAN FOONG HIN [ KOTA KINABALU ]** minta **MENTERI KOMUNIKASI DAN MULTIMEDIA** menyatakan tindakan Kementerian dalam menangani ucapan kebencian anti-pendatang ketika jangkitan COVID-19 meningkat di Malaysia seperti dilaporkan oleh Reuters pada 14 Oktober 2020 yang bertajuk "*Anti- migrant sentiment fanned on social media, little action taken by Facebook*", berkenaan pelarian Islam Rohingya dari Myanmar.

**JAWAPAN**

**Tuan Yang Dipertua,**

Untuk makluman Ahli Yang Berhormat, Kementerian melalui pelbagai medium dan program kesedaran serta advokasi sentiasa mengingatkan orang awam agar tidak menyalahgunakan media sosial untuk menyebarkan kandungan atau bahan yang berunsur kecaman terhadap sesebuah kumpulan, yang boleh menimbulkan kemarahan serta menjejaskan ketenteraman.

Perkongsian, perbincangan, komentar, kritikan, maklum balas dan pendapat pihak tertentu berhubung situasi, kejadian, perkara atau isu semasa adalah sebahagian daripada hak dan kebebasan yang termaktub dalam Perkara 10 Perlembagaan Persekutuan Malaysia. Pihak Kerajaan komited dalam mendukung hak tersebut bagi memastikan setiap rakyat Malaysia menikmati kebebasan asasi mereka. Kebebasan untuk membincangkan perkara-perkara atau berita secara terbuka dan telus di media sosial perlu dikekalkan tetapi ia harus dibuat dengan cara yang berhemah dan tidak melanggar sebarang peruntukan undang-undang.

Selain itu, kandungan ucapan kebencian atau *'hate speech content'* sememangnya menjadi kesalahan di platform media sosial seperti *Facebook* dan *Instagram*, atau di platform penstriman video seperti *YouTube*. Kandungan-kandungan yang dilaporkan akan dinilai berdasarkan terma dan syarat yang ditetapkan oleh pihak mereka, seterusnya akan dipadamkan sekiranya kandungan tersebut didapati melanggar terma dan syarat, serta piawaian komuniti atau *community standards* (dengan izin) yang ditetapkan oleh pihak mereka.

Kementerian juga sentiasa menyebarkan maklumat yang sahih melalui kenyataan media, infografik dan liputan berita/video yang dikeluarkan oleh Jabatan Penyiaran Malaysia (RTM) dan BERNAMA berkaitan menangani ucapan kebencian anti-pendatang ketika jangkitan COVID-19 meningkat di Malaysia melalui platform media sosial rasmi Kementerian.

Dalam menangani ucapan kebencian anti-pendatang ketika jangkitan COVID-19 meningkat di Malaysia baru-baru ini, RTM telah mendapatkan pandangan pelbagai pihak berkuasa dan berintegriti bagi membincangkan usaha kerajaan dan penyatuan masyarakat dalam membendung anasir luar yang cuba memburukkan Malaysia.

Dalam tempoh berkenaan juga, RTM menerusi saluran-saluran TV, radio dan media dalam taliannya telah menyiarkan sejumlah 174 hebahan berbentuk laporan berita mengenai kesamarataan layanan kerajaan terhadap pendatang asing walaupun dengan penyebaran pandemik COVID-19. Ia secara tidak langsung telah menangkis persepsi tidak benar mengenai layanan Malaysia kepada warga asing di negara ini.

Bagi isu pelarian Rohingya baru-baru ini, RTM telah memaparkan pelbagai laporan berita mengenai usaha Malaysia dalam menangani isu berkenaan secara adil dan saksama. Dalam tempoh Mac hingga September 2020 sebanyak 150 kali laporan yang disiarkan RTM tertumpu kepada:

- a. Ketegasan pihak berkuasa terutama yang mengawal perairan negara mengawal kemasukan pelarian ke negara ini dalam memastikan keselamatan rakyat amnya;
- b. Toleransi Malaysia terhadap pelarian menerusi layanan saksama dan berperikemanusiaan;
- c. Kawalan jangkitan Covid-19 oleh pasukan kesihatan terhadap pelarian termasuk ujian calit dan kuarantin;
- d. Penghantaran pulang pelarian sebaik disahkan negatif wabak; dan
- e. Gesaan kepada pertubuhan antarabangsa dan negara serantau untuk sama-sama menggalas tanggungjawab bantuan kemanusiaan

Pada 8 Julai 2020, RTM telah mengupas isu pelarian Rohingya ini menerusi rancangan bual bicaranya, dengan mengajak rakyat agar

memfokuskan usaha penyatuan masyarakat dalam situasi COVID-19 dan penyatuan dalam membendung anasir luar yang memburukkan Malaysia.

RTM bagaimanapun peka dengan cubaan pelbagai pihak yang menyebarkan maklumat secara tidak bertanggungjawab di platform media sosial. Bagi menanganinya, RTM telah menerbitkan rancangan '**Pastikan Sahih**' bagi memberikan maklumat yang benar dan membetulkan maklumat palsu yang tular. Rancangan 'Pastikan Sahih' bersiaran setiap Isnin hingga Jumaat pada jam 6.30 petang di Saluran Berita RTM *Myfreeview* 123.

Kenyataan-kenyataan penafian atau penjelasan yang dibuat akan disebarkan oleh Pasukan Respons Pantas (PRP) KKMM serta diterbitkan dalam Portal Sebenarnya.my sebagai repositori kepada berita-berita yang telah ditentukan dan untuk menjadi sumber rujukan bagi orang ramai menentusahkan sesuatu berita yang tular.

Selain daripada Portal Sebenarnya.my, Kementerian juga telah menjalankan **Kempen "Kebebasan Bersuara bukan Kebebasan Berbohong"** serta **Jawatankuasa Jenayah Siber PDRM-MCMC** sebagai salah satu inisiatif untuk memupuk kesedaran serta mendidik masyarakat Malaysia agar tidak mudah terjebak menjadi mangsa virus berita palsu secara proaktif melalui penglibatan pihak media seperti stesen-stesen televisyen; merangkumi awam dan swasta, media cetak serta media dalam talian.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' SYED ABU HUSSIN  
BIN HAFIZ SYED ABDUL FASAL  
[BUKIT GANTANG]**

**TARIKH : 19 NOVEMBER 2020 (KHAMIS)**

**SOALAN**

**DATO' SYED ABU HUSSIN BIN HAFIZ SYED ABDUL FASAL [ BUKIT GANTANG ]** minta **MENTERI KEWANGAN** menyatakan status terkini kewangan negara dan apakah jaminan Kerajaan bahawa peruntukan-peruntukan kebajikan rakyat bagi golongan B40 dan M40 tidak akan dipotong serta bajet-bajet bagi memperkasakan agenda Prihatin Rakyat dapat diteruskan selepas ini.

**JAWAPAN**

**Tuan Yang di-Pertua,**

Untuk makluman Ahli Yang Berhormat,

Susulan penularan pandemik COVID-19, kutipan hasil Kerajaan pada tahun 2020 telah disemak semula kepada RM227.3 bilion iaitu pengurangan sebanyak RM17.2 billion atau 7% berbanding anggaran asal. Anggaran ini adalah berasaskan kepada yang dijangka menguncup pada kadar 4.5% dan jangkaan harga minyak mentah yang rendah sekitar USD40 setong. Jumlah perbelanjaan pula dianggar meningkat kepada RM314.7 bilion susulan pertambahan perbelanjaan bagi melaksanakan pakej rangsangan dan pelan pemulihan ekonomi. Justeru, defisit fiskal pada tahun 2020 telah disemak semula dan dianggar meningkat daripada 3.2% kepada 6.0% berbanding KDNK.

Bagi tahun 2021 pula, kedudukan kewangan dijangka bertambah baik selaras dengan pemulihan dalam pertumbuhan ekonomi antara 6.5% hingga 7.5%. Jumlah hasil Kerajaan dijangka meningkat kepada RM236.9 bilion manakala jumlah perbelanjaan dianggar sebanyak RM322.5 bilion. Sehubungan dengan peningkatan KDNK, defisit fiskal diunjur lebih rendah iaitu 5.4% daripada KDNK pada 2021 walaupun perbelanjaan terus meningkat. Namun, Kerajaan komited bagi mengurangkan defisit fiskal secara berperingkat tanpa menjejaskan momentum pemulihan ekonomi termasuk menyediakan bantuan yang sewajarnya kepada semua golongan bagi melindungi kehidupan rakyat. Ini adalah untuk menentukan terdapat ruang fiskal bagi menangani keperluan masa hadapan.

Golongan B40 dan M40 sentiasa diberi perhatian dan tumpuan dalam merangka sebarang dasar Kerajaan. Dalam Belanjawan 2021, Kerajaan memperuntukkan lebih RM30 bilion ringgit bagi penyediaan subsidi, insentif dan pelbagai jenis bantuan kepada rakyat termasuk mengawal kenaikan harga barangan dan perkhidmatan untuk manfaat keseluruhan rakyat terutama dari kumpulan B40 dan M40.

## NO SOALAN : 15

Antara inisiatif dan program utama yang telah diumumkan semasa Belanjawan 2021 bagi membantu meredakan kos sara hidup dan menjaga kebajikan rakyat adalah seperti:

- a) Bantuan Prihatin Rakyat (BPR), iaitu bantuan tunai yang telah diperluaskan kepada isi rumah yang berpendapatan bulanan antara RM500 hingga RM1,800. Dijangka seramai 8.1 juta penerima akan menikmati BPR berbanding 4.3 juta penerima di bawah BSH;
- b) Penangguhan bayaran pinjaman secara automatik atau moratorium selama 3 bulan kepada B40, manakala kepada Kumpulan M40 layak dipertimbang, Bantuan Bayaran Bersasar dengan hanya membuat pengisytiharan sendiri atau self-declaration pengurangan pendapatan untuk mendapat bantuan bayaran balik. Untuk makluman, setakat Oktober 2020, sejumlah 85% daripada peminjam telah mula membayar semula pinjaman mereka;
- c) Penurunan kadar cukai pendapatan untuk individu pemastautin diturunkan sebanyak 1 mata peratusan bagi banjaran pendapatan bercukai 50,001 hingga 70,000ringgit yang mana dapat memanfaatkan hampir 1.4 juta pembayar cukai; dan
- d) Pemberian pelbagai Perlindungan Sosial melalui MySalam, Perlindungan Tenang, PekaB40 dan Skim Bencana Pekerjaan PERKESO.

Selain itu, Kerajaan juga telah menambahbaik kadar bantuan kebajikan bulanan bernilai RM2.2 billion. Ini termasuk:

- a) Kadar bantuan OKU tidak berupaya bekerja dinaikkan daripada RM250 kepada RM300;
- b) Kadar Bantuan Warga Emas dan Bantuan Penjagaan OKU dan Pesakit Kronik Terlantar dinaikkan daripada RM350 kepada RM500;

c) Kadar Elaun Pekerja OKU dinaikkan daripada RM400 kepada RM450; dan

d) Kadar Bantuan Kanak-kanak Keluarga Miskin dinaikkan daripada RM100 untuk 1 anak maksimum RM450 sekeluarga, kepada RM150, setiap anak berumur antara 7 hingga 18 tahun, atau RM200 untuk setiap anak berumur 6 tahun ke bawah dengan maksimum RM1,000 sekeluarga.

Terdapat juga program baharu yang turut membantu kumpulan B40 termasuk Program Jaringan Prihatin, iaitu Kerajaan akan menyediakan bantuan tunai sehingga RM180 dalam bentuk kredit telekomunikasi. Bantuan ini boleh digunakan untuk perbelanjaan langganan internet atau menampung sebahagian kos pembelian telefon bimbit baharu. InshaAllah, hampir 8 juta rakyat akan menerima manfaat bagi program ini.

Di samping bentuk bantuan sosial dan bantuan tunai, Kerajaan juga memberi fokus kepada penyediaan dan tawaran kerja. Melalui Skim Jaminan Penjanaaan Pekerjaan (JanaKerja), sebanyak 500,000 peluang pekerjaan baharu akan diwujudkan mulai tahun hadapan termasuk pelbagai program peningkatan kemahiran dan latihan semula melalui perbelanjaan Kerajaan sebanyak 3.7 bilion ringgit. Sehubungan itu, aspek kebajikan dan kelangsungan hidup pendapatan rakyat sentiasa dititikberatkan.

Belanjawan 2021 merupakan penzahiran konsep Prihatin Rakyat yang didokong teguh oleh Kerajaan. Kebajikan dan kesihatan rakyat adalah keutamaan, manakala kelangsungan perniagaan serta ketahanan ekonomi menjadi pegangan demi mencapai kemakmuran bersama.

Sekian, terima kasih



**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK DR. HASAN BIN BAHROM [ TAMPIN ]**

**TARIKH : 19 NOVEMBER 2020 [ KHAMIS ]**

**SOALAN**

Minta **MENTERI PERUMAHAN DAN KERAJAAN TEMPATAN** menyatakan sejauh manakah pemantauan dilakukan dan apakah langkah-langkah yang telah dan akan dilakukan oleh Kementerian dalam mengatasi isu pembuangan sampah di tempat yang tidak sepatutnya dilakukan.

**JAWAPAN**

Tuan Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan (KPKT) melalui Perbadanan Pengurusan Sisa Pepejal Dan Pembersihan Awam (SWCorp) telah melaksanakan pelbagai usaha dalam mengatasi masalah pembuangan sampah haram oleh pihak yang tidak bertanggungjawab.

2. Bagi tempoh 1 Januari hingga 31 Ogos 2020, sebanyak 843 operasi sampah haram telah dilaksanakan dan sebanyak 858 lokasi sampah haram telah dibasmi di 7 buah negeri yang menerima pakai Akta Pengurusan Sisa Pepejal dan Pembersihan Awam 2007 (Akta 672). Menerusi operasi-operasi pembasmian lokasi sampah haram yang telah dijalankan, sebanyak 14 kes telah didakwa dan disabitkan kesalahan di bawah Seksyen 71 (1) Akta 672 dengan jumlah denda sebanyak RM164,000.00. Kes-kes ini membabitkan lokasi di Wilayah Persekutuan Kuala Lumpur, Johor dan Negeri Sembilan.

3. Antara langkah-langkah bagi mengatasi masalah pembuangan sampah haram di 7 negeri yang menerima pakai Akta 672 adalah:

- (a) pemantauan secara berkala oleh anggota penguatkuasa SWCorp di kawasan perkhidmatan serta beberapa lokasi *hot spot* pembuangan sampah haram;
- (b) membersihkan lokasi sampah haram yang telah dikenal pasti;
- (c) memasang papan tanda serta *barrier tape* bagi kawasan yang telah dibersihkan dan berpotensi menjadi lokasi pembuangan sampah haram;
- (d) memantau secara bersepadu antara SWCorp, agensi penguatkuasaan yang berkaitan serta masyarakat setempat

dalam memastikan pembuangan sampah haram tidak berlaku;

- (e) melaksanakan program libat urus bersama penduduk setempat dan mengedarkan risalah berkaitan kesalahan-kesalahan serta hukuman yang boleh dikenakan di bawah Akta 672;
- (f) menjalankan “Operasi Intip dan Cekup” bagi mengenal pasti mereka yang tidak bertanggungjawab melanggar undang-undang membuang sampah di lokasi yang tidak dibenarkan; dan
- (g) melaksanakan tindakan ke atas pelaku kesalahan yang membuang sisa secara haram mengikut Seksyen 71, Akta 672. Jika disabitkan kesalahan, pesalah boleh dikenakan denda tidak kurang daripada RM10,000 dan tidak melebihi RM100,000 atau dipenjarakan selama tempoh tidak kurang daripada 6 bulan dan tidak melebihi 5 tahun atau kedua-duanya.

4. Persekitaran bebas daripada sampah haram merupakan tanggungjawab bersama dan penglibatan orang awam amat diharapkan supaya masyarakat setempat lebih bertanggungjawab dengan tidak membuang sampah di tempat yang tidak dibenarkan. Sebarang aduan berkaitan pembuangan sampah haram boleh dilaporkan kepada SWCorp melalui talian bebas tol Indahkan Malaysia 1-800-88-7472.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN CHE ALIAS BIN HAMID  
[KEMAMAN]**

**TARIKH : 19 NOVEMBER 2020 (KHAMIS)**

**SOALAN**

**TUAN CHE ALIAS BIN HAMID [ KEMAMAN ]** minta **MENTERI TENAGA DAN SUMBER ASLI** menyatakan rancangan Kementerian untuk menambah bilangan anggota PERHILITAN serta aset-aset strategiknya berikutan peningkatan konflik hidupan liar seperti gajah dan harimau dalam Parlimen Kemaman.

**JAWAPAN**

Tuan Yang di-Pertua,

1. Jabatan PERHILITAN telah melakukan penstrukturan semula semua kakitangan mengikut bidang tugas termasuk pengurusan konflik hidupan liar dan penguatkuasaan pada tahun 2018 di semua daerah di setiap negeri di Semenanjung Malaysia. Di samping itu, aset-aset strategik sedia ada adalah mencukupi bagi menjalankan kerja-kerja pengurusan konflik hidupan liar dan penguatkuasaan.

2. Buat masa ini terdapat sebanyak 7 perjawatan di bawah Jabatan PERHILITAN di mana 5 perjawatan telah diisi. Dalam masa yang sama, bagi meningkatkan kapasiti perlaksanaan kerja-kerja pengurusan konflik hidupan liar, Jabatan PERHILITAN sedang mengusahakan pengisian 2 kekosongan perjawatan di Daerah Kemaman.

3. Dari segi penguatkuasaan, operasi Jabatan PERHILITAN juga dibantu dengan penglibatan Veteran Angkatan Tentera Malaysia (ATM) dan Orang Asli (OA) yang lantik secara *contract for service* (CFS) di bawah inisiatif *Biodiversity Protection and Patrolling Programme* (BP3) mulai Julai 2020.

4. Untuk makluman Ahli Yang Berhormat, kerja-kerja pengurusan konflik hidupan liar dalam Parlimen Kemaman akan dilaksanakan secara optimum dengan perjawatan sedia ada dan pertambahan bilangan perjawatan akan dimohon jika terdapat keperluan pada masa akan datang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN CHAN MING KAI [ALOR SETAR]**

**TARIKH : 19 NOVEMBER 2020 (KHAMIS)**

**SOALAN**

**TUAN CHAN MING KAI [ ALOR SETAR ]** minta **MENTERI KEWANGAN** menyatakan dalam lima tahun kebelakangan ini, jumlah pembayar cukai borang BE yang :

- (a)menuntut pelepasan bagi insurans pendidikan dan perubatan serta jumlah telah dituntut; dan
- (b)berpendapatan berkanun pengajian tahunan melebihi RM30 ribu tetapi tiada membuat bayaran awal PCB bulanan.

**JAWAPAN**

Tuan Yang di-Pertua,

Untuk makluman Yang Berhormat, jumlah pembayar cukai Borang BE yang menuntut pelepasan insurans pendidikan dan perubatan sejak tahun taksiran 2015 sehingga 2019 adalah seramai 7.2 juta dengan jumlah tuntutan sebanyak RM16.09 bilion.

Jumlah pembayar cukai borang BE yang mempunyai berpendapatan berkanun penggajian tahunan melebihi RM30 ribu tetapi tidak membuat bayaran Potongan Cukai Bulanan (PCB) sejak tahun taksiran 2015 sehingga 2019 adalah seramai 2.4 juta orang. Berkemungkinan pembayar cukai ini tidak membuat bayaran PCB disebabkan beberapa perkara seperti menuntut rebat cukai atau zakat ataupun majikan gagal membuat PCB daripada saraan bulanan semasa pekerja atau majikan gagal meremitkan PCB yang telah dipotong kepada pihak Lembaga Hasil Dalam Negeri Malaysia.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB TUAN NIK MOHAMAD ABDUH BIN  
NIK ABDUL AZIZ [ BACHOK ]**

**TARIKH : 19 NOVEMBER 2020 (KHAMIS)**

**SOALAN**

**TUAN NIK MOHAMAD ABDUH BIN NIK ABDUL AZIZ [ BACHOK ]** minta **MENTERI KOMUNIKASI DAN MULTIMEDIA** menyatakan perancangan pihak Kementerian terhadap laporan-laporan berkaitan akses internet yang terhad di kawasan luar bandar sehingga menyukarkan para pelajar dan guru untuk membuat pembelajaran dan pengajaran secara atas talian.

**JAWAPAN**

**Tuan Yang di-Pertua,**

Untuk makluman Ahli Yang Berhormat, Kementerian Sentiasa memberikan tumpuan kepada penambahbaikan infrastruktur komunikasi melalui penyediaan liputan jalur lebar berkelajuan tinggi dengan menggunakan pelbagai teknologi di seluruh negara terutamanya di kawasan luar bandar di seluruh negara.

Di bawah pelan Jalinan Digital Negara (JENDELA), penambahbaikan infrastruktur digital yang dilaksanakan secara berfasa akan memberikan kualiti pengalaman yang sama rata antara kawasan bandar dan luar bandar. Sasaran fasa pertama yang kini telah bermula sehingga tahun 2022 ialah :

- a. penambahan daripada 4.95 juta premis kepada 7.50 juta premis mendapat akses kepada jalur lebar talian tetap berkelajuan gigabit;



- b. perluasan liputan jalur lebar mudah alih 4G daripada 91.8% kepada 96.9% di kawasan yang berpenduduk; serta
- c. mempertingkatkan kelajuan purata jalur lebar mudah alih daripada 25Mbps kepada 35Mbps.

Bagi mencapai sasaran yang ditetapkan, tambahan sebanyak lebih 2.5 juta premis akan disediakan akses kepada perkhidmatan jalur lebar berkelajuan gigabit melalui rangkaian gentian optik. Untuk perkhidmatan jalur lebar mudah alih, sejumlah 2,601 menara baharu akan dibina, manakala sebanyak 20,803 alat pemancar komunikasi sedia ada akan dinaik taraf kepada teknologi 4G.

Untuk makluman Ahli Yang Berhormat, sehingga kini terdapat sebanyak 873 Pusat Internet Komuniti (PIK) di seluruh negara di bawah kelolaan SKMM yang boleh digunakan sebagai pelengkap (*complement*) untuk pembelajaran atas talian oleh para pelajar untuk pembelajaran dan mengakses internet.

Walau bagaimanapun, segala inisiatif pembangunan infrastruktur digital ini memerlukan kerjasama dari semua pihak, terutamanya di peringkat Kerajaan Negeri dan Pihak Berkuasa Tempatan (PBT) untuk pemudahcaraan proses dan kelulusan bagi projek-projek yang telah dirancang dan yang akan dilaksanakan.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DR. MASZLEE BIN MALIK  
[ SIMPANG RENGAM ]**

**TARIKH : 19 NOVEMBER 2020 (KHAMIS)**

**SOALAN**

Minta **MENTERI PENDIDIKAN** menyatakan apakah status semasa tindakan pihak Kementerian terhadap laporan Jawatankuasa Kajian Dasar Pendidikan Negara (JKD) yang diserahkan pada 2 Mei 2019 serta menyatakan komitmen supaya laporan berkenaan akan diangkat kepada Jemaah Menteri pada tahun ini dan seterusnya dimaklumkan kepada rakyat.

**JAWAPAN**

Tuan Yang di-Pertua,

Kementerian Pendidikan Malaysia (KPM) telah selesai menjalankan makmal untuk menganalisis serta memperhalusi secara menyeluruh kesemua syor Jawatankuasa Kajian Dasar Pendidikan Negara (JKDPN). Dapatan makmal ini telah menghasilkan beberapa syor penyelesaian.

Untuk makluman Ahli Yang Berhormat, KPM telah memutuskan supaya Kajian Separuh Penggal Pelan Pembangunan Pendidikan Malaysia (PPPM) 2013 – 2025 dijalankan dalam tiga fasa. Kajian Separuh Penggal PPPM Fasa 1 dan Fasa 2 telah selesai dilaksanakan. Dapatan daripada laporan JKDPN juga telah digunakan sebagai input dalam Kajian Separuh Penggal PPPM Fasa 2.

Pada masa ini, KPM sedang melaksanakan Kajian Separuh Penggal PPPM Fasa 3 (KSP3) dan dijangka akan selesai pada akhir bulan Januari 2021. Kajian ini akan menilai jurang pencapaian sasaran aspirasi dan intervensi yang telah ditetapkan dalam PPPM 2013 – 2025. Makmal KSP3 akan diadakan antara bulan Disember 2020 dan Januari 2021 bagi memperincikan penyelesaian untuk merapatkan jurang pencapaian PPPM. Laporan KSP3 akan disediakan dalam bulan Februari 2021. Keseluruhan dapatan Kajian Separuh Penggal PPPM ini akan dilaporkan bersekali dalam satu Memorandum Jemaah Menteri untuk dibentang dan pertimbangkan dalam Mesyuarat Jemaah Menteri selewat-lewatnya pada akhir Februari 2021.

Sekian, terima kasih.

**PEMBERITAHUAN PERTANYAAN DEWAN RAKYAT,  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN NIK NAZMI BIN NIK AHMAD  
(SETIAWANGSA)**

**TARIKH : 19 NOVEMBER 2020 (KHAMIS)**

**SOALAN**

Minta **MENTERI PERTAHANAN** menyatakan apakah dasar terkini Kerajaan terhadap kes buli di kalangan tentera dan tindakan yang diambil untuk mengatasinya.

**JAWAPAN**

Tuan Yang di-Pertua,

Kementerian Pertahanan memandang serius terhadap sebarang kejadian berunsur penganiayaan dan penderaan seperti kes buli di kalangan warga Angkatan Tentera Malaysia (ATM) dan tidak akan berkompromi terhadap pelaku-pelaku yang dibuktikan bersalah.

Di peringkat Perkhidmatan Darat, Laut dan Udara, usaha bagi membendung gejala ini dilaksanakan dengan senantiasa mengeluarkan pengarah dan peringatan terhadap warga tentera untuk menjauhkan diri daripada perbuatan buli dan kesan negatif yang bakal dihadapi oleh pelaku.

Justeru, berhubung dengan soal kes buli di kalangan warga tentera, sekiranya didapati berlaku, tindakan tatatertib yang tegas di bawah Akta Angkatan Tentera 1972 akan dikenakan oleh Perkhidmatan ke atas pelaku. Manakala bagi kes-kes buli yang menyebabkan berlakunya unsur jenayah dan pertuduhan di bawah Kanun Keseksaan, tindakan susulan akan diserahkan kepada Pihak Berkuasa Awam.

Warga tentera yang terlibat dalam kes buli, setelah didakwa dan disabitkan atas kesalahan samada oleh Perkhidmatan atau Mahkamah Awam akan ditamatkan perkhidmatan di bawah Peraturan-Peraturan Angkatan Tentera (Terma-Terma Perkhidmatan Bagi Angkatan Tetap) 2013 atas sebab salah laku serta berhadapan dengan risiko tidak layak untuk menerima pencen, ganjaran perkhidmatan dan faedah-faedah pemberhentian lain.

Terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN SIVAKUMAR VARATHARAJU NAIDU  
[ BATU GAJAH ]**

**TARIKH : 19 NOVEMBER 2020 (KHAMIS)**

**SOALAN**

Minta **MENTERI PENDIDIKAN** menyatakan sama ada semua aktiviti kokurikulum telah diberhentikan di sekolah-sekolah sebagai langkah kawalan penularan COVID-19. Apakah langkah-langkah tambahan yang disarankan oleh Kementerian Pendidikan supaya sekolah-sekolah berada dalam keadaan yang selamat dan bebas daripada ancaman COVID-19

**JAWAPAN**

**Tuan Yang di-Pertua,**

Kementerian Pendidikan Malaysia (KPM) sentiasa prihatin dan memberi keutamaan dalam aspek keselamatan dan kesihatan murid, khususnya ketika berada di kawasan sekolah bagi mengikuti aktiviti pengajaran dan pembelajaran, termasuk juga aktiviti kokurikulum.

Untuk makluman Ahli Yang Berhormat, KPM telah mengeluarkan Garis Panduan Pelaksanaan Aktiviti Sukan dan Kokurikulum bagi membolehkan aktiviti sukan dan kokurikulum secara bersemuka dapat dilaksanakan di sekolah mulai 1 September 2020. Garis panduan ini juga membolehkan murid melaksanakan aktiviti sukan dan kokurikulum secara terkawal di sekolah bagi memenuhi keperluan pengisian data Pentaksiran Aktiviti Jasmani, Sukan dan Kokurikulum (PAJSK) murid untuk tahun semasa.

Walaupun bagaimanapun, berikutan gelombang ketiga pandemik COVID-19 yang mencatatkan peningkatan jangkitan kes positif COVID-19, KPM telah mengarahkan supaya semua program/aktiviti sukan, kokurikulum, seminar, bengkel serta aktiviti lain yang dijalankan secara bersemuka ditangguhkan mulai 21 Oktober 2020. Tindakan ini merupakan antara usaha untuk mengekang penularan jangkitan COVID-19 dalam kalangan warga sekolah, terutamanya murid sekolah.

**Tuan Yang di-Pertua,**

Dalam konteks pengoperasian persekolahan, sekolah telah dibuka semula secara berperingkat bermula pada 24 Jun 2020. Pihak sekolah dan guru telah membuat persiapan rapi bagi memastikan keselamatan dan kesihatan murid, guru serta kakitangan sekolah sepanjang mereka berada di sekolah. Ini melibatkan pematuhan *standard operating procedures* (SOP) serta garis panduan yang ditetapkan seperti Garis Panduan Pengurusan Pembukaan Semula Sekolah dan Garis Panduan Pengurusan Pembukaan Semula Institut Pendidikan Guru dan Kolej Matrikulasi.

Sepanjang tempoh sekolah dibuka semula, KPM sentiasa memantau pelaksanaan operasi sekolah mengikut garis panduan berkenaan dan mencadangkan penambahbaikan berdasarkan situasi dan keperluan semasa agar ianya kekal relevan. Sehubungan itu, garis panduan baharu, iaitu Garis Panduan Pengurusan dan Pengoperasian Sekolah Dalam Norma Baharu dan Garis Panduan Pengurusan dan Pengoperasian Institut Pendidikan Guru dan Kolej Matrikulasi Dalam Norma Baharu digunakan bagi menggantikan garis panduan sedia ada mulai 5 Oktober 2020.

Pada masa ini semua sekolah di bawah KPM ditutup mulai 9 November 2020 sehingga ke hari akhir persekolahan tahun ini iaitu pada 17 Disember 2020. Sebagai persediaan untuk pembukaan semula sesi persekolahan bagi tahun 2021, KPM akan sentiasa berusaha menambah baik garis panduan sedia ada demi keselamatan dan kesihatan warga sekolah, khususnya dalam kalangan murid sekolah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN JUNE LEOW HSIAD HUI  
[ HULU SELANGOR ]**

**TARIKH : 19 NOVEMBER [ KHAMIS ]**

**SOALAN**

Minta **MENTERI PERUMAHAN DAN KERAJAAN TEMPATAN** menyatakan sejauh manakah pihak berkuasa tempatan mengambil tindakan terhadap kilang pemprosesan sisa plastik haram.

**JAWAPAN**

**Tuan Yang di-Pertua,**

1. Untuk makluman Yang Berhormat, Pihak Berkuasa Tempatan (PBT) sentiasa mengambil tindakan penguatkuasaan bagi membanteras kilang pemprosesan sisa plastik haram. Melalui data yang diperolehi dari PBT, bagi tahun 2019 terdapat 1,450 buah kilang plastik yang telah dilesenkan oleh PBT di seluruh Malaysia. Namun begitu, terdapat sebanyak 142 buah kilang plastik haram telah dikenal pasti dan 70 buah kilang telah diambil tindakan penguatkuasaan.
2. Bagi tahun ini sehingga 1 November 2020, terdapat sebanyak 1,508 buah kilang plastik berlesen di bawah PBT dan 261 buah kilang plastik haram telah dikenal pasti. Sebanyak 270 tindakan penguatkuasaan telah dilaksanakan ke atas kilang plastik haram pada tahun ini.



3. Untuk makluman Yang Berhormat juga, antara tindakan yang telah diambil oleh PBT bagi membendung masalah kilang plastik haram adalah seperti berikut:

- (a) Mewujudkan pasukan kerja khas (*task force*) kilang haram bagi menjalankan pemantauan dan penguatkuasaan serta pemeriksaan;
- (b) Melaksanakan operasi penguatkuasaan bersepadu bersama Polis Diraja Malaysia (PDRM), Jabatan Imigresen Malaysia, Jabatan Alam Sekitar (JAS), Tenaga Nasional Berhad (TNB) dan Suruhanjaya Perkhidmatan Air Negara (SPAN);
- (c) Melaksanakan tindakan penguatkuasaan iaitu dengan mengeluarkan Notis Pemberhentian dan Kompaun di bawah Undang-Undang Kecil Pelesenan Tred Perniagaan Dan Perindustrian; dan
- (d) Mengambil tindakan penguatkuasaan di bawah Seksyen 72(1), 72(4), 72(6), Akta Jalan, Parit dan Bangunan 1974 (Akta 133). Sebagai contoh, tindakan merobohkan struktur bangunan/premis jika berlaku pelanggaran Seksyen 70 Akta 133 iaitu premis yang dibina tanpa kelulusan samada baru ataupun pengubahsuaian dan menggunakannya selain daripada maksud ianya dibina.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN WONG TACK [ BENTONG ]**

**TARIKH : 19 NOVEMBER 2020 (KHAMIS)**

**SOALAN**

Minta **MENTERI SAINS, TEKNOLOGI DAN INOVASI** menyatakan status terkini proses kelulusan pembinaan PDF Lynas, termasuk kelulusan EIA, lokasi PDF dan kontraktor yang terlibat.

**JAWAPAN**

Tuan Yang di-Pertua,

Untuk makluman Ahli Yang Berhormat, pada 28 Julai 2020, Lembaga Perlesenan Tenaga Atom telah meluluskan tapak cadangan bagi pembinaan PDF Lynas dengan keluasan 12.2 hektar di dalam kawasan yang diluluskan oleh Kerajaan Negeri Pahang. Lokasi yang dimaksudkan adalah di Tapak Pelupusan Sisa Industri Berjadual Pelbagai Kategori di Bukit Ketam, Mukim Kuala Kuantan, Kuantan, Pahang dengan keluasan 202.36 hektar.

Walau bagaimanapun, kelulusan ini tertakluk kepada Kajian Radiological Impact Assessment (RIA), Kajian Environmental Impact Assessment (EIA) dan lain-lain keperluan oleh Pihak Berkuasa Tempatan (PBT)/ Persekutuan yang lain.

**Tuan Yang di-Pertua,**

Bidang Rujukan (*Term of Reference, TOR*) Laporan EIA bagi cadangan projek bertajuk *Proposed Developement of A Dedicated Long-Term Storage Facility For The Water Leach Purification Residue At Bukit*

**NO. SOALAN : 24**

*Ketam in Mukim Kuantan, Daerah Kuantan, Pahang Darul Makmur* telah dihantar ke Jabatan Alam Sekitar pada 15 September 2020. Pemaju projek adalah Lynas Malaysia Sdn Bhd manakala perunding adalah AGV Environment Sdn Bhd.

Mesyuarat Jawatankuasa Bagi Membincangkan Terma Rujukan (TORAC) telah diadakan pada 13 Oktober 2020. TOR berkenaan tidak dapat disahkan dan perlu dikemaskini dengan mengambilkira ulasan agensi-agensi dan individu yang dilantik semasa Mesyuarat TORAC. TOR baru yang telah dikemaskini telah di hantar ke Jabatan Alam Sekitar pada 27 Oktober 2020 dan sedang diproses.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN WONG KAH WHO [IPOH TIMUR]**

**TARIKH : 19 NOVEMBER 2020 (KHAMIS)**

**SOALAN**

**TUAN WONG KAH WOH [ IPOH TIMUR ]** minta **MENTERI KEWANGAN** menyatakan jumlah kutipan GST dari tahun 2016 sehingga 2018 dan jumlah kutipan SST dari tahun 2018 sehingga sekarang. Nyatakan sejauh mana keberkesanan pelaksanaan SST dalam menurunkan kadar inflasi negara.

**JAWAPAN**

Tuan Yang Dipertua,

Untuk makluman ahli Yang Berhormat, jumlah kutipan bersih Cukai Barangan dan Perkhidmatan (GST), iaitu setelah ditolak *refund* dari tahun 2016 sehingga dimansuhkan pada 1 Jun 2018 adalah sebanyak **RM105.76 billion**. Manakala bagi Cukai Jualan dan Cukai Perkhidmatan (MySST), jumlah kutipan bersih semenjak diperkenalkan semula dari 1 September 2018 sehingga 31 Oktober 2020 adalah sebanyak **RM52.95 billion**.

Dari segi Indeks Harga Pengguna (IHP), ketika MySST diperkenalkan pada September 2018, IHP meningkat dengan kadar 0.3% dari tahun-ke-tahun pada September 2018, berbanding 0.2% pada Ogos 2018. Hal ini boleh dikaitkan dengan pelbagai faktor, termasuk GST Berkadar Sifar yang dilaksanakan dari Jun 2018 hingga Ogos 2018. Pada bulan Jun 2019, kadar IHP mula meningkat ke 1.5%, dan seterusnya, dengan izin, *normalise* pada bulan-bulan yang seterusnya, Julai 2019 dengan kadar 1.4%, dan bulan Ogos 2019, 1.5%.

Tuan Yang-Dipertua,

Pelaksanaan MySST setakat ini adalah selama tempoh 2 tahun dan satu bulan. Sebelum wabak COVID-19 melanda negara, purata kadar inflasi sebanyak 0.7% telah dicatatkan dari September 2018 hingga Februari 2020 iaitu dalam tempoh MySST berkuatkuasa.

Bagi bulan-bulan berikutnya, termasuklah sehingga bulan September 2020, kadar IHP telah menunjukkan angka negatif akibat impak yang menyeluruh terhadap negara berikutan pelaksanaan Perintah Kawalan Pergerakan (PKP). Perkara ini digambarkan melalui IHP yang merekodkan kadar negatif dari bulan Mac sehinggalah September 2020, yang mana penurunan IHP pada bulan April 2020 sebanyak 2.9% merupakan kadar terendah sejak tahun 2010.

**Tuan Yang Dipertua,**

Saya ingin menegaskan bahawa, dari segi hasil kerajaan, Kementerian Kewangan sentiasa berusaha untuk mencari sumber hasil yang baharu, tanpa membebankan kos hidup rakyat.

Dalam Belanjawan 2021, Kerajaan telah mengumumkan beberapa langkah untuk meningkatkan kutipan hasil. Antara langkah yang telah diperkenalkan termasuklah mengenakan duti eksais pada rokok elektronik dan menghapuskan pengecualian cukai terhadap produk tembakau di pulau bebas cukai. Kerajaan juga akan meningkatkan Pasukan Petugas Pelbagai-Agensi untuk membanteras kegiatan penyeludupan, terutamanya produk yang dikenakan eksais duti yang tinggi.

Selain itu, Kerajaan juga telah menubuhkan sebuah jawatankuasa untuk mengkaji pelbagai langkah meningkatkan pendapatan dan hasil negara, Kajian ini merangkumi analisis mengenai kesan langkah baharu Kerajaan terhadap ekonomi dan rakyat, serta kelemahan sistem percukaian semasa.

Secara keseluruhan, kami akan terus fokus pada pelaksanaan pakej ransangan ekonomi negara dan juga Belanjawan 2021 untuk memastikan bantuan diterima oleh rakyat yang memerlukan. Kami juga akan mengimbangi antara pemulihan ekonomi jangka pendek dan pertumbuhan berterusan jangka panjang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN CHAN FOONG HIN [KOTA KINABALU]**

**TARIKH : 19 NOVEMBER 2020 (KHAMIS)**

**SOALAN**

**TUAN CHAN FOONG HIN [ KOTA KINABALU ]** minta **MENTERI KEWANGAN** menyatakan secara terperinci cadangan Kerajaan untuk menggabungkan '*consolidate*' bantuan tunai langsung kepada rakyat seperti Bantuan Sara Hidup, *Wage Subsidy Programme*, dan Geran Khas Prihatin 2.0 dalam Pakej KITA PRIHATIN menjadi '*automatic stabiliser*'. Bagaimanakah Kerajaan memastikan ianya betul-betul sampai kepada mereka yang terjejas.

**JAWAPAN**

**Tuan Yang di-Pertua,**

Kerangka Inisiatif Tambahan Pakej Rangsangan Ekonomi Prihatin Rakyat (KITA PRIHATIN) bernilai RM10 bilion yang telah diumumkan oleh YAB Perdana Menteri pada 23 September 2020 lalu merupakan pakej rangsangan ekonomi Ke-4 yang diumumkan Kerajaan selepas PRIHATIN, PRIHATIN PKS+ dan PENJANA, menjadikan jumlah keseluruhan pakej rangsangan sebanyak RM305 billion atau 21% kepada Keluaran Dalam Negara Kasar (KDNK).

KITA PRIHATIN mempunyai objektif jelas iaitu mengurangkan beban rakyat, mengekalkan pekerjaan dan membantu perniagaan. Ia merangkumi inisiatif berikut:

**1. Pertama, Geran Khas Prihatin atau GKP bagi Pembukaan Semula**

- a. Dengan peruntukan sebanyak **RM600 juta**, GKP dianggarkan akan memanfaatkan sebanyak **200,000 PKS mikro**. Permohonan GKP dibuka semula untuk PKS mikro yang tidak sempat memohon sebelum ini dan bertujuan untuk memulakan semula perniagaan dan mengurangkan beban aliran tunai mereka.

**b) Kedua, Program Subsidi Upah 2.0**

- a. Di bawah inisiatif ini, peruntukan sejumlah **RM2.4 bilion** akan disediakan. Dijangkakan inisiatif ini akan memanfaatkan seramai **160,000 majikan** dan **2.4 juta pekerja**, selama 3 bulan (atau 6 bulan bagi permohonan baharu).

**c) Ketiga, Bantuan Prihatin Nasional 2.0**

- a. Di bawah BPN2.0, sejumlah **RM7 bilion** telah diperuntukkan bagi membantu seramai **10.6 juta penerima** isi rumah dan



bujang dari golongan B40 dan M40. Ini menjadikan keseluruhan BPN melebihi RM18 bilion. Pembayaran BPN 2.0 akan disalurkan secara automatik, mengikut senarai penerima BPN terdahulu. Permohonan baharu juga akan dibuka bagi yang tidak menerima bantuan sebelum ini mulai 15 Oktober 2020 sehingga 15 November 2020.

Bagi memastikan semua program rangsangan ekonomi dilaksanakan dengan pantas dan memanfaatkan golongan sasaran secara berkesan, sebuah Unit Pelaksanaan dan Koordinasi Stimulus Ekonomi Antara Agensi Nasional atau LAKSANA telah ditubuhkan di Kementerian Kewangan. Kemajuan pelaksanaan program dan inisiatif pakej rangsangan telah dilaporkan setiap minggu oleh saya sendiri.

Di samping itu, survei dan lawatan turun ke padang juga dijalankan bagi mendapat maklum balas terus dari penerima bantuan khasnya dan rakyat amnya untuk tujuan penambahbaikan inisiatif akan datang. Yang Berhormat dijemput untuk melayari laman web Kementerian Kewangan untuk mendapatkan laporan mengenai perkembangan terkini pelaksanaan pakej-pakej rangsangan berkenaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DR. MASZLEE BIN MALIK  
[ SIMPANG RENGAM ]**

**TARIKH : 19 NOVEMBER 2020 (KHAMIS)**

**SOALAN**

Minta **MENTERI PENDIDIKAN** menyatakan hala tuju industri perbukuan di Malaysia serta sama ada wujud usaha sama dengan Kementerian Pengajian Tinggi, Kementerian Pelancongan, Seni dan Budaya dan Kementerian Sains, Teknologi dan Inovasi untuk meningkatkan penerbitan bermutu oleh para karyawan, ahli akademik dan penulis tanah air.

**JAWAPAN**

Tuan Yang di-Pertua,

Kementerian Pendidikan Malaysia (KPM) melalui Dewan Bahasa dan Pustaka (DBP), Institut Terjemahan dan Buku Malaysia (ITBM) serta Majlis Buku Kebangsaan Malaysia (MBKM) sentiasa memastikan hala tuju industri perbukuan relevan dan sesuai dengan perkembangan semasa seiring dengan kemajuan teknologi terkini.

Dalam hal ini, KPM sedang meneliti, mengkaji dan melaksanakan semakan semula Dasar Buku Negara (DBN). Antara strategi yang dikenal pasti, termasuklah meningkatkan ekonomi perbukuan dengan penggunaan teknologi perkongsian pintar. Usaha ini turut disokong oleh Pelan Tindakan Industri Perbukuan Negara, yang antaranya meningkatkan tadbir urus agensi yang terlibat dan jaringan hubungan dalam kalangan penggiat industri.

Untuk makluman Ahli Yang Berhormat, DBP dan ITBM sentiasa menawarkan khidmat dan kerjasama penerbitan dengan mana-mana pihak bagi meningkatkan penerbitan bermutu oleh para karyawan, ahli akademik dan penulis tanah air. Tumpuan diberikan kepada usaha meningkatkan bakat, kemahiran dan kepakaran mereka yang terlibat dalam ekosistem industri ini agar selari dengan perilaku pembaca yang semakin beralih dan cenderung kepada pembacaan digital.

DBP giat menerbitkan judul baharu dalam bentuk bercetak dan digital pada setiap tahun yang meliputi pelbagai bidang. Judul-judul ini dihasilkan dengan kerjasama institusi pengajian tinggi di bawah Kementerian Pengajian Tinggi. Pada tahun 2018 hingga 2020, misalnya, DBP telah bekerjasama dengan 11 buah universiti awam dengan menerbitkan 93 judul dan melibatkan seramai 133 orang penulis.

DBP turut menyokong usaha menyemarakkan kegiatan pelancongan, seni dan budaya yang bersifat Malaysiana seperti penerbitan Siri Sejarah Nusantara yang mengetengahkan sejarah negeri-negeri di Malaysia dan judul berkaitan dengan songket, makyung, busana, budaya dan seni dalam membantu mempromosikan usaha Kementerian Pelancongan,

Seni dan Budaya Malaysia. Berdasarkan data tiga tahun terakhir, terdapat 62 judul diterbitkan dengan melibatkan bidang pelancongan (tujuh judul), kesenian (18 judul) dan budaya (37 judul).

Selain itu, kerjasama penerbitan turut melibatkan agensi awam seperti Agensi Nuklear Malaysia di bawah Kementerian Sains, Teknologi dan Inovasi, Jabatan Perikanan Malaysia (Kementerian Pertanian dan Industri Makanan), Jabatan Pembangunan Kemahiran (Kementerian Sumber Manusia) serta Institut Penyelidikan Perubatan (Kementerian Kesihatan Malaysia). Sehingga kini, terdapat 50 judul telah diterbitkan.

Di samping itu, ITBM juga telah menerbitkan 62 judul termasuk kerjasama dengan pihak universiti dan Kementerian Pelancongan, Seni dan Budaya Malaysia bagi tahun 2019 hingga tahun 2020. Judul ini melibatkan 48 karya asli dan 14 karya terjemahan.

KPM dan agensi terlibat akan terus berusaha memartabatkan industri perbukuan melalui kerjasama erat dengan pelbagai pihak berkaitan bagi menghasilkan karya berkualiti seiring dengan perkembangan dan keperluan semasa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK SERI SAIFUDDIN NASUTION BIN ISMAIL  
[KULIM-BANDAR BHARU]**

**TARIKH : 19 NOVEMBER 2020 (KHAMIS)**

**SOALAN**

**DATUK SERI SAIFUDDIN NASUTION BIN ISMAIL [ KULIM-BANDAR BHARU ]** minta **MENTERI KEWANGAN** menyatakan perincian "*revenue*" Kerajaan sekarang yakni sumber atau puncanya, perbelanjaan pembangunan dan pengurusan serta defisit semasa.

**JAWAPAN**

**Tuan Yang di-Pertua,**

1. Penularan pandemik COVID-19 serta pengenalan pakej rangsangan dan pelan pemulihan ekonomi dijangka memberi kesan kepada kedudukan kewangan Kerajaan Persekutuan. Kutipan hasil Kerajaan Persekutuan pada tahun 2020 telah disemak semula dan dianggarkan berkurang sebanyak RM17.2 billion atau 7% kepada RM227.3 bilion berbanding anggaran asal. Ini adalah selari dengan KDNK yang dijangka menguncup dan jangkaan harga minyak mentah yang rendah sekitar USD40 setong. Manakala, jumlah perbelanjaan pula dianggar meningkat kepada RM314.7 bilion susulan pertambahan perbelanjaan bagi melaksanakan pakej rangsangan dan pelan pemulihan ekonomi. Justeru, defisit fiskal pada tahun 2020 telah disemak semula dan dianggar meningkat daripada 3.2% kepada 6.0% kepada KDNK.

2. Untuk makluman ahli Yang Berhormat, daripada jumlah hasil Kerajaan Persekutuan yang dianggarkan berjumlah RM227.3 bilion, hasil cukai adalah sebanyak RM153.3 bilion di mana hasil cukai langsung adalah sebanyak RM115.1 bilion manakala cukai tidak langsung pula berjumlah RM38.1 bilion. Hasil bukan cukai pula dianggar sebanyak RM74 bilion. Antara komponen utama yang menyumbang kepada jumlah hasil adalah cukai pendapatan syarikat sebanyak RM59.4 bilion dan cukai pendapatan individu sebanyak RM35.9 bilion iaitu mewakili sekitar 42% daripada jumlah keseluruhan hasil Kerajaan Persekutuan.

3. Peruntukan perbelanjaan Kerajaan Persekutuan yang telah disemak semula bagi 2020 pula adalah lebih tinggi iaitu RM314.7 bilion berbanding anggaran awal sebanyak RM297 bilion. Daripada jumlah ini, RM226.7 bilion atau 72% disalurkan untuk OE, RM50 bilion (atau 15.9%) untuk DE manakala baki RM38 bilion (atau 12.1%) untuk Kumpulan Wang COVID-19. Bagi peruntukan mengikut sektor yang tidak mengambil kira peruntukan Kumpulan Wang COVID-19, sebanyak 37.9% diperuntukkan bagi program dan projek di bawah sektor sosial diikuti sektor ekonomi sebanyak 16.2%, keselamatan 10.9% dan pentadbiran am 7.3%. Baki peruntukan berjumlah RM76.7 bilion (atau 27.7%) diperuntukkan bagi perbelanjaan tanggungan dan bayaran pindahan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATIN PADUKA DR. TAN YEE KEW  
[ WANGSA MAJU ]**

**TARIKH : 19 NOVEMBER 2020 [ KHAMIS ]**

**SOALAN**

Minta **MENTERI PERUMAHAN DAN KERAJAAN TEMPATAN** menyatakan adakah Kementerian bercadang menubuhkan dana penyenggaraan bagi membantu Jawatankuasa Perbadanan Perumahan (JMB/MC) di rumah pangsa kos rendah yang dahulunya penempatan semula penghuni rumah setinggan. Kutipan Fi penyelenggaraan tersebut tidak mencukupi untuk gantian tangki dan lif yang berharga tinggi.

**JAWAPAN**

**Tuan Yang di-Pertua,**

1. Untuk makluman Yang Berhormat, secara amnya penempatan semula setinggan boleh dibuat di Program Perumahan Rakyat (PPR) yang disediakan oleh Kerajaan sama ada PPR (Dimiliki) atau PPR (Disewa) atau di perumahan swasta kos rendah mengikut kawasan.
2. Program Perumahan Rakyat (PPR) diuruskan oleh sama ada Kerajaan Persekutuan melalui Kementerian Perumahan dan Kerajaan Tempatan (KPKT) atau oleh Kerajaan Negeri / Pihak Berkuasa Tempatan (PBT). Bagi PPR yang diuruskan oleh KPKT, penyelenggaraan bangunan diuruskan oleh Jabatan Perumahan Negara (JPN) melalui ejen pengurusan yang dilantik. Manakala bagi PPR yang diurus oleh Kerajaan Negeri/PBT, urusan penyelenggaraan dilaksanakan oleh Kerajaan Negeri/ PBT yang berkenaan.
3. Bagi rumah pangsa/rumah awam yang dibangunkan oleh Kerajaan Negeri, adalah menjadi tanggungjawab pemilik bangunan iaitu pihak Kerajaan Negeri untuk melaksanakan penyelenggaraan bangunan secara berkala. Manakala bagi perumahan strata swasta pula, penyelenggaraan adalah di bawah tanggungjawab pihak pengurusan (JMB/MC) kawasan tersebut untuk mengurus dan menyenggara bangunan dan harta bersama mereka.
4. Walau bagaimanapun, Kerajaan menyedari terdapat perumahan strata kos rendah dan sederhana rendah yang berhadapan dengan isu kutipan fi atau caj penyelenggaraan yang tidak mencukupi kerana kos penyelenggaraan yang semakin tinggi. Kerajaan Persekutuan telah menyediakan peruntukan bantuan penyelenggaraan melalui Program Penyelenggaraan Perumahan (PPP) bagi perumahan awam dan Tabung Penyelenggaraan Perumahan Malaysia (TPPM) bagi perumahan swasta kos rendah dan sederhana rendah.



5. Untuk perumahan awam, pihak Kerajaan Negeri boleh terus mengemukakan permohonan kepada KPKT. Manakala bagi perumahan strata swasta kos rendah dan sederhana rendah pula, permohonan boleh dikemukakan oleh pihak pengurusan JMB/MC kepada KPKT melalui Pesuruhjaya Bangunan (COB) di PBT masing-masing.

6. Peruntukan yang disediakan adalah bagi membaik pulih kerosakan/penyelenggaraan harta bersama secara *one-off* di bangunan strata yang terlibat. Antara skop kerja di bawah bantuan yang disediakan ini adalah pembaikan atau penggantian lif, tangki air, paip sanitari, bumbung, *handrail*, pendawaian elektrik, mengecat, kerosakan umum, pagar dan cerun.

7. Untuk makluman Yang berhormat juga, pelaksanaan TPPM dan PPP adalah tidak termasuk bagi kawasan pemajuan di bawah Wilayah Persekutuan Kuala Lumpur.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' NGEH KOO HAM [BERUAS]**

**TARIKH : 19 NOVEMBER 2020 (KHAMIS)**

**SOALAN**

**DATO' NGEH KOO HAM [ BERUAS ]** minta **MENTERI KEWANGAN** menyatakan jumlah kenaikan hutang Kerajaan dari 1 Mac 2020 hingga sekarang. Kepada siapa penambahan hutang-hutang tersebut terhutang, (senaraikan nama dan jumlah bagi setiap kes).

**JAWAPAN**

**Tuan Yang di-Pertua,**

1. Sehingga akhir-Mac 2020, jumlah hutang Kerajaan Persekutuan adalah RM823.8 bilion atau 57.2% daripada KDNK. Manakala, sehingga akhir-September 2020, jumlah hutang Kerajaan Persekutuan telah meningkat kepada RM874.3 bilion atau 60.7% daripada KDNK. Peningkatan hutang ini adalah setelah mengambilkira pinjaman kasar sebanyak RM108.2 bilion merangkumi pembiayaan semula kertas hutang yang matang berjumlah RM56.8 bilion dan pinjaman bersih sebanyak RM51.4 bilion digunakan bagi membiayai defisit dalam tempoh yang sama.

**Tuan Yang di-Pertua,**

2. Secara umumnya, 76% daripada hutang Kerajaan Persekutuan merupakan pemegangan domestik dan selebihnya adalah pemegangan asing. Sehingga akhir-Jun 2020, pemegangan oleh pelabur/institusi domestik dalam hutang Kerajaan Persekutuan meliputi Kumpulan Wang Simpanan Pekerja (26.9%), Kumpulan Wang Persaraan (Diperbadankan) (KWAP) (2.8%), syarikat insurans (4.3%), institusi perbankan (34.6%), institusi kewangan pembangunan (1.5%) dan lain-lain (5.7%). Pemegangan oleh bukan pemastautin pula adalah sebanyak 24.2% daripada jumlah hutang Kerajaan Persekutuan.

3. Selain itu, 96.7% daripada jumlah hutang Kerajaan Persekutuan adalah hutang domestik dan bakinya adalah pinjaman luar pesisir. Oleh itu, risiko hutang Kerajaan terhadap perubahan tukaran asing adalah terkawal. Tambahan pula, purata tempoh matang hutang Kerajaan adalah 8.6 tahun pada 2020 (2019: 8.1 tahun), menunjukkan risiko pembiayaan semula hutang Kerajaan yang terurus.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : TUAN TONY PUA KIAM WEE [DAMANSARA]**

**TARIKH : 19 NOVEMBER 2020 (KHAMIS)**

**SOALAN**

**TUAN TONY PUA KIAM WEE [ DAMANSARA ]** minta **MENTERI KEWANGAN** menyatakan kedudukan penstrukturan Malaysia Airlines (MAS), termasuk jumlah hutang, kerugian semasa, pelaburan oleh Khazanah Nasional, perbincangan penggabungan atau pelaburan asing dan keperluan dana. Apakah kemungkinan MAS akan ditutup.

**JAWAPAN**

Tuan Yang di-Pertua,

Selari dengan pelaksanaan Pelan Pemulihan Malaysian Airline System Bhd (MAS) yang bertujuan menstruktur semula dan memulihkan operasi syarikat penerbangan nasional, Malaysia Airlines Berhad (MAB) telah ditubuhkan pada 7 November 2014. Penubuhan MAB bertujuan untuk mengambil alih operasi, aset dan liabiliti syarikat MAS. MAB seterusnya diletakkan di bawah Malaysia Aviation Group Berhad (MAGB) yang dimiliki sepenuhnya oleh Khazanah Nasional Berhad (Khazanah).

Prestasi kewangan MAGB antara tahun 2015 hingga 2018 adalah seperti berikut:

<b>Tahun</b>	<b>Keuntungan/ (Kerugian) - RM</b>
2015	(1.1b)

2016	(0.7b)
2017	(1.2b)
2018	(1.3 b)

Setakat 31 Ogos 2020, jumlah kecairan yang dimiliki oleh Kumpulan MAGB adalah kira-kira RM366 juta selain kira-kira RM578 juta yang tersedia untuk digunakan daripada dana yang diperuntukkan oleh Khazanah. Jumlah liabiliti MAGB pada masa ini adalah dianggarkan sebanyak RM16 bilion.

Kesan COVID-19 terhadap industri penerbangan secara global adalah amat buruk dan Malaysia Airlines tidak terkecuali daripada menerima impak daripada penularan pandemik ini. Malaysia Airlines kini beroperasi dengan kira-kira 75% daripada pesawatnya tidak dapat diterbangkan akibat sekatan perjalanan, dan turut menyaksikan kapasiti dan pendapatannya terjejas.

Bagi mengatasi masalah kewangan MAGB dan MAB, Kerajaan akan mengadakan rundingan lanjut dengan pihak Khazanah bagi mengenal pasti hala tuju syarikat khususnya dalam memperkukuhkan kedudukan kewangannya dan mengenal pasti penyelesaian strategik yang terbaik bagi kumpulan penerbangan tersebut.

Sebarang keputusan mengenai operasi MAGB bergantung kepada hasil rundingan MAGB dengan pihak pemiutang dan pemajak bagi menstruktur semula syarikat. Dalam masa yang sama, pihak pengurusan Khazanah juga akan melaksanakan usaha terbaik bagi memastikan kebajikan kakitangan kumpulan MAGB terpelihara termasuk, sekiranya perlu, bayaran pampasan yang setimpal yang mematuhi undang-undang pekerjaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK SERI SHAMSUL ISKANDAR @  
YUSRE BIN MOHD AKIN [HANG TUAH JAYA]**

**TARIKH : 19 NOVEMBER 2020 (KHAMIS)**

**SOALAN**

Minta **MENTERI PENDIDIKAN** menyatakan apakah perancangan Kementerian untuk menambah baik sistem pembelajaran khususnya dalam talian, bagi membantu anak-anak istimewa (OKU) yang terjejas akibat COVID-19.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) komited dalam memastikan semua murid, termasuk murid berkeperluan khas (MBK) mendapat akses kepada pendidikan secara optimum. Dalam tempoh negara berdepan dengan ancaman pandemik COVID-19 ini, KPM sentiasa prihatin dan telah mengambil langkah untuk menambah baik kaedah pengajaran dan pembelajaran (PdP), terutamanya PdP secara dalam talian. Ini amat penting bagi memastikan kaedah pengajaran dan pembelajaran yang digunakan adalah setara dan bersesuaian mengikut keperluan MBK. Walau bagaimanapun, KPM menyedari bahawa tidak semua MBK mampu mengikuti pembelajaran secara dalam talian memandangkan mereka mempunyai ketidakupayaan yang berbeza, khususnya bagi MBK yang memerlukan sokongan secara maksimum.

Untuk makluman Ahli Yang Berhormat, KPM juga menyediakan akses pembelajaran kepada MBK melalui kaedah *Home-based Learning*

mengikut kesesuaian guru dan murid. Kaedah *Home-based Learning* ini dilaksanakan melalui pelantar pembelajaran digital, iaitu *Digital Education Learning Initiative Malaysia* (DELIMa). Melalui pelantar ini, MBK dan guru boleh mengakses aplikasi seperti *Google Classroom* dan *Google Meet*, *Microsoft 365*, *Apple Teacher Learning Centre*, buku teks digital, video PdP, kuiz dan video permainan pembelajaran. Selain itu, ibu bapa juga boleh mengakses EduwebTV dan CikgooTube untuk membantu dalam pembelajaran anak mereka di rumah. Bagi membantu kumpulan MBK yang tidak mempunyai akses kepada talian internet dan alat peranti yang sesuai untuk pembelajaran secara dalam talian, *Home-based Learning* turut dilaksanakan melalui siaran TV Pendidikan dan serahan bahan pembelajaran kepada murid.

Sehingga kini, sebanyak 30 bahan video pembelajaran untuk MBK kategori kurang upaya pendengaran peringkat sekolah rendah dan menengah telah dihasilkan. Selain itu, sebanyak enam bahan video pembelajaran MBK kategori kurang upaya penglihatan juga telah dihasilkan. Sehingga Oktober 2020, sebanyak 1,300 rakaman rancangan TV Pendidikan yang mempunyai juru bahasa kod tangan telah disediakan untuk tayangan di saluran TV Okey, Radio Televisyen Malaysia. Bagi MBK kategori masalah pembelajaran dan kurang upaya pelbagai pula, KPM telah menyediakan pelbagai modul pembelajaran yang boleh dilaksanakan di rumah oleh ibu bapa/ penjaga.

KPM sentiasa berusaha untuk menambah bahan pembelajaran dalam talian yang bersesuaian kepada MBK. Bagi MBK kategori masalah pembelajaran, KPM menyediakan bahan video pembelajaran berkonsepkan tugas yang lebih berstruktur dan berunsurkan didik hiburan. Ini adalah kerana MBK kategori masalah pembelajaran terbahagi kepada beberapa sub kategori yang lain seperti *sindrom down*, *Attention Deficit Hyperactive Disorder* (ADHD) dan *autisme*. Oleh itu, PdP kepada MBK ini perlu mengikut sub kategori, sebagai contoh, MBK sindrom down yang lebih tertarik kepada nyanyian. Maka, guru perlu menyediakan bahan PdP dengan menerapkan unsur *fun learning* atau didik hiburan bagi mendorong anak-anak ini berminat untuk mengikuti PdP dengan dibantu ibu bapa/ penjaga di rumah.

Di samping itu, bagi memastikan pembelajaran dan aktiviti berunsurkan intervensi dapat dilaksanakan di rumah, Rancangan Pendidikan Individu (RPI) dan pek aktiviti telah dikongsikan kepada ibu bapa/penjaga setiap MBK. Perbincangan serta persetujuan dari ibu bapa/penjaga dalam membentuk RPI adalah merupakan peringkat yang wajib dilakukan supaya kedua-dua belah pihak bersetuju dan memahami matlamat sebenar yang ingin dicapai. Guru menyediakan dokumen RPI yang lengkap dan menyerahkan kepada ibu bapa/penjaga untuk melaksanakan aktiviti intervensi di rumah berdasarkan RPI tersebut. Guru juga menyediakan pek intervensi yang merangkumi kemahiran pengurusan diri serta interaksi sosial mengikut keperluan MBK. RPI dan pek aktiviti amat penting kepada MBK bagi memastikan kesinambungan perkembangan pembelajaran dan potensi diri MBK.

KPM sentiasa berusaha sebaik mungkin untuk meningkatkan lagi keberkesanan kaedah *Home-based Learning* kepada semua MBK. Walau bagaimanapun, keberkesanan PdP secara talian agak terhad berbanding kaedah secara bersemuka, khususnya bagi MBK. Ini adalah kerana MBK memerlukan sentuhan secara fizikal bagi membantu mereka mengurus diri, tingkah laku dan juga emosi.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN HAJI AHMAD BIN HASSAN [PAPAR]**

**TARIKH : 19 NOVEMBER 2020 (KHAMIS)**

**SOALAN**

**TUAN HAJI AHMAD BIN HASSAN [ PAPAR ]** minta **MENTERI KEWANGAN** menyatakan sektor-sektor pekerjaan berskala kecil dan sederhana di negeri Sabah yang termasuk dalam 1,846 penerima bantuan Program Pengekalan Pekerjaan dari kalangan majikan, dan bagaimanakah ia mampu memotivasikan para majikan untuk mengekalkan kakitangan mereka yang sedia ada biarpun mengalami kemerosotan keuntungan.

**JAWAPAN**

**Tuan Yang di-Pertua,**

Untuk makluman Ahli Yang Berhormat, Kerajaan telah memperkenalkan Program Pengekalan Pekerjaan COVID-19 di bawah Pakej Rangsangan Ekonomi Prihatin Rakyat (PRIHATIN) sebagai salah satu langkah untuk membantu pihak majikan yang terjejas akibat pandemik COVID-19 mengekalkan kelangsungan pendapatan pekerja mereka yang diarah mengambil cuti tanpa gaji.

Bagi negeri Sabah, sebanyak lebih 1,800 pekerja telah memanfaatkan program ini. Daripada jumlah ini, sebanyak 29 peratus adalah daripada sektor perkhidmatan, diikuti sektor penginapan dan aktiviti perkhidmatan makanan dan minuman sebanyak 16 peratus serta sektor perdagangan borong dan runcit termasuk bengkel pembaikan kenderaan sebanyak 14 peratus.

Mulai 15 Jun 2020, Program Pengekalan Pekerjaan telah digabungkan dengan Program Subsidi Upah (PSU). PSU telah berjaya membantu majikan dengan mengekalkan pekerja dengan menampung sebahagian kos gaji pekerja. Setakat 30 Oktober 2020, sebanyak RM12.16 bilion telah disalurkan kepada sebanyak lebih daripada 322 ribu majikan di seluruh negara dan memanfaatkan seramai 2.64 juta pekerja. Kini di bawah KITA PRIHATIN, Kerajaan telah melanjutkan tempoh PSU kepada 3 bulan lagi bagi membantu majikan yang masih terkesan mengekalkan pekerjaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**  
**DARIPADA : TUAN PANG HOK LIONG [ LABIS ]**  
**TARIKH : 19 NOVEMBER 2020 (KHAMIS)**

**SOALAN**

Minta **MENTERI PENGAJIAN TINGGI** menyatakan jumlah pinjaman tertunggak oleh peminjam-peminjam Perbadanan Tabung Pendidikan Tinggi Nasional (PTPTN) telah meningkat :-

- (a) nyatakan jumlah pinjaman tertunggak oleh peminjam-peminjam PTPTN setakat bulan September 2020 dan bilangan peminjam-peminjam yang masih berhutang dalam peratusan mengikut kaum; dan
- (b) impaknya kepada anak muda yang akan datang dan adakah Kerajaan bercadang untuk menghapuskan hutang PTPTN.

**JAWAPAN**

**Tuan Yang di-Pertua,**

Kementerian amat prihatin terhadap bebanan yang dihadapi oleh peminjam-peminjam PTPTN untuk membuat bayaran balik pinjaman akibat pandemik COVID-19 yang melanda negara. Atas keprihatin itu, kementerian telah menangguhkan pembayaran balik oleh semua peminjam PTPTN sehingga Disember 2020. Jumlah keseluruhan anggaran penangguhan bayaran balik adalah sebanyak RM1.125 billion.

Untuk makluman Ahli Yang Berhormat, sehingga 30 September 2020, jumlah bayaran balik pinjaman PTPTN yang tertunggak adalah sebanyak RM8.36 bilion. Daripada jumlah tersebut, RM3.8 bilion tertunggak daripada 865,429 peminjam yang tidak membayar secara konsisten manakala bakinya daripada 391,793 peminjam yang tidak pernah membuat bayaran balik.

Bagi tempoh yang sama, sejumlah lebih 2.18 juta peminjam masih berhutang dan perlu membuat bayaran balik pinjaman pendidikan PTPTN dengan nilai sebanyak RM24.51 bilion. Daripada jumlah tersebut, 71.63 peratus atau 1.56 juta merupakan peminjam bumiputera dan 28.37 peratus atau 617,926 peminjam bukan bumiputera.

Model pembiayaan pinjaman yang digunapakai oleh PTPTN amat bergantung kepada prestasi bayaran balik sebagai sumber utama dana bagi membiayai pinjaman sedia ada dan baharu. Kekurangan dana akan meningkatkan kebergantungan PTPTN kepada jaminan Kerajaan dan mengurangkan bilangan penawaran pinjaman baharu. Justeru, kementerian belum bercadang untuk menghapuskan hutang PTPTN dalam masa terdekat supaya penawaran pinjaman baharu kepada pelajar yang layak dapat diteruskan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN WONG LING BIU [SARIKEI]**

**TARIKH : 19 NOVEMBER 2020 (KHAMIS)**

**SOALAN**

**TUAN WONG LING BIU [ SARIKEI ]** minta **MENTERI KEWANGAN** menyatakan semenjak krisis pandemik wabak COVID-19 syarikat penerbangan telah mengalami banyak kerugian, apakah langkah Kerajaan bagi membantu syarikat penerbangan swasta seperti AirAsia dan Malindo Air bagi membendung masalah tersebut.

**JAWAPAN**

**Tuan Yang di-Pertua,**

Penularan wabak Covid-19 yang telah diisytiharkan sebagai pandemik oleh Pertubuhan Kesihatan Sedunia (World Health Organisation - WHO) pada 11 Mac 2020 bukan sahaja telah menyebabkan krisis kesihatan dan sosial malah krisis ekonomi di kebanyakan negara di dunia. Sebagai sebuah negara perdagangan kecil yang mengamalkan sistem ekonomi terbuka, Malaysia turut menerima kesan buruk akibat pandemik ini. Kesan ekonomi yang dialami ini bersifat menyeluruh dan dirasakan oleh semua sektor dalam negara termasuklah sektor penerbangan yang disebabkan oleh penutupan sempadan dan pelaksanaan perintah kawalan pergerakan bagi menangani penularan wabak COVID-19 tersebut.

Untuk makluman Ahli Dewan, Kerajaan komited membantu semua pihak yang terjejas dengan penularan wabak COVID-19 ini. Walau bagaimanapun, pada masa ini Kerajaan tidak terlibat dalam pelan menyelamatkan mana-mana syarikat termasuk syarikat penerbangan komersial memandangkan Kerajaan perlu memastikan apa-apa bantuan yang diberikan terutamanya daripada segi kewangan mempunyai kerangka kerja dan objektif yang jelas. Sebarang cadangan pemulihan kewangan syarikat adalah tertakluk kepada pertimbangan dan kelulusan Lembaga Pengarah dan pemegang saham syarikat masing-masing.

**Tuan Yang di-Pertua,**

Mengambil kira kesan krisis ekonomi semasa yang menyeluruh, Kerajaan berpandangan pemberian bantuan wajar dilaksanakan secara meluas dan tidak terhad kepada syarikat penerbangan sahaja. Bantuan ini telah dilaksanakan oleh Kerajaan melalui beberapa pakej rangsangan dan pelan pemulihan ekonomi seperti PRIHATIN, PRIHATIN PKS+, PENJANA dan KITA PRIHATIN yang keseluruhannya bernilai RM305 bilion bagi membantu pekerja dan rakyat yang terjejas pendapatan serta perniagaan yang mengalami masalah aliran tunai termasuk syarikat penerbangan

tempatan. Antara langkah yang telah dilaksanakan seperti yang diumumkan sebelum ini antaranya termasuklah moratorium bayaran balik pinjaman perniagaan dan pinjaman isi rumah, Bantuan Prihatin Nasional, program subsidi upah, skim pengeluaran i-Lestari, skim jaminan pembiayaan perniagaan, skim kredit mikro, dana pembiayaan PKS dan banyak lagi.

Bank Negara Malaysia (BNM) juga telah menurunkan Kadar Dasar Semalaman (OPR) dan Keperluan Rizab Berkanun (SRR) bagi meningkatkan mudah tunai untuk menyokong aktiviti pengantaraan kewangan. BNM turut menyatakan ketersediaan bantuan bayaran balik pinjaman bersasar kepada peminjam yang terjejas berikutan COVID-19. Kemudahan ini boleh dipohon terus kepada institusi kewangan komersial berkaitan merangkumi pelanjutan moratorium dan pengurangan bayaran ansuran.

Kerajaan juga melalui Skim Jaminan Prihatin Danajamin (SJPD) menyediakan program pembiayaan bernilai RM50 bilion dengan jaminan sebanyak 80% ke atas pembiayaan modal kerja syarikat. Kemudahan jaminan ini disediakan untuk manfaat kepada semua syarikat yang beroperasi di Malaysia dalam semua sektor termasuk sektor penerbangan tertakluk kepada syarat-syarat kelayakan yang telah ditetapkan.

Kerajaan juga melalui Belanjawan 2021 akan menyediakan program latihan dan penempatan semula bagi 8,000 kakitangan dari syarikat penerbangan di Malaysia dengan peruntukan sebanyak RM50 juta. Inisiatif khusus ini adalah sebagai tambahan kepada bantuan yang telah dilaksanakan sebelum ini, serta inisiatif-inisiatif lain yang diumumkan dalam Belanjawan 2021 bagi membantu pekerja dan rakyat yang terjejas pendapatan termasuklah kakitangan syarikat penerbangan.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB TUAN WONG KAH WOH  
[IPOH TIMUR ]**

**TARIKH : 19 NOVEMBER 2020 (KHAMIS)**

**SOALAN**

**TUAN WONG KAH WOH [ IPOH TIMUR ]** minta **MENTERI KOMUNIKASI DAN MULTIMEDIA** menyatakan apakah usaha khas daripada pihak Kerajaan untuk menambah jaringan perkhidmatan internet khususnya di kawasan desa dan luar bandar, dan usaha membantu rakyat dalam memiliki perkhidmatan internet yang lebih murah dalam masa COVID-19 yang mana perkhidmatan internet menjadi suatu keperluan.

**JAWAPAN**

**Tuan Yang di-Pertua,**

Untuk makluman Ahli Yang Berhormat, Kementerian melalui Suruhanjaya Komunikasi dan Multimedia Malaysia (SKMM) sentiasa memberi tumpuan kepada penambahbaikan infrastruktur komunikasi melalui penyediaan liputan jalur lebar berkelajuan tinggi dengan menggunakan pelbagai teknologi. Ini adalah untuk membolehkan rakyat dapat menikmati akses kepada perkhidmatan jalur lebar berkelajuan tinggi yang lebih menyeluruh.

Pelan Jalinan Digital Negara atau JENDELA yang telah diumumkan oleh YAB Perdana Menteri, Tan Sri Muhyiddin Yassin pada 29 Ogos lalu merupakan inisiatif oleh Kerajaan dan pemain industri bagi mempertingkatkan tahap kesalinghubungan serta kualiti pengalaman



perkhidmatan komunikasi di seluruh negara melalui pembangunan infrastruktur yang lebih cepat dan menyeluruh.

Melalui JENDELA, penambahbaikan infrastruktur digital yang dilaksanakan secara berfasa akan memberikan kualiti pengalaman yang sama rata antara kawasan bandar dan luar bandar.

Sasaran fasa pertama yang kini telah bermula sehingga tahun 2022 ialah:

- a. penambahan daripada 4.95 juta premis kepada 7.50 juta premis mendapat akses kepada jalur lebar talian tetap berkelajuan gigabit;
- b. perluasan liputan jalur lebar mudah alih 4G daripada 91.8% kepada 96.9% di kawasan yang berpenduduk; serta
- c. mempertingkatkan kelajuan purata jalur lebar mudah alih daripada 25Mbps kepada 35Mbps.

Pelan JENDELA juga akan melibatkan penamatan rangkaian 3G secara berperingkat sehingga akhir tahun 2021 untuk mengoptimumkan penggunaan spektrum bagi pemantapan rangkaian 4G. Bagi fasa kedua pelan JENDELA dalam tempoh Rancangan Malaysia ke-12, ia akan melibatkan penyediaan teknologi 5G selepas platform yang kukuh di dalam fasa pertama ini dapat dicapai.

Kementerian bersama-sama dengan SKMM serta syarikat-syarikat penyedia perkhidmatan mendukung komitmen untuk memberi pengalaman terbaik kepada rakyat dan menjana pembangunan semula negara melalui penyediaan infrastruktur komunikasi yang mampan.

Walau bagaimanapun, segala inisiatif pembangunan infrastruktur digital ini memerlukan kerjasama dari semua pihak, terutamanya di peringkat Kerajaan Negeri dan Pihak Berkuasa Tempatan (PBT) untuk memudahkan proses dan kelulusan bagi projek-projek yang telah dirancang dan yang akan dilaksanakan.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN TEO NIE CHING [ KULAI ]**

**TARIKH : 19 NOVEMBER 2020 (KHAMIS)**

**SOALAN**

Minta **MENTERI PENDIDIKAN** menyatakan sama ada pengenalan tulisan jawi akan diteruskan dalam buku teks baharu darjah 5 untuk SK dan SJK. Sekiranya ya, apa tambah baik berbanding zaman PH yang dilaksanakan, isi kandungan dan berapa muka surat dalam buku teks baharu.

**JAWAPAN**

**Tuan Yang di-Pertua,**

Untuk makluman Ahli Yang Berhormat, pengenalan tulisan jawi dalam aspek seni bahasa kurikulum Bahasa Melayu untuk murid Tahun 5 diteruskan seperti yang telah diputuskan dalam mesyuarat Jemaah Menteri pada 14 Ogos 2019. Begitu juga penerbitan buku teks turut diteruskan menggunakan konsep penerbitan buku teks Tahun 4 kegunaan 2020 iaitu mengekalkan tiga muka surat berkaitan tulisan jawi bagi SJK dan 6 muka surat bagi SK. Tulisan jawi yang diperkenalkan adalah berkaitan objek seharian dan diajar dalam konteks tema-tema yang terpilih.

Mengambil kira Akta Pendidikan 1996, KPM akan memperhalusi semula perkara berkaitan dengan tulisan jawi ini secara menyeluruh dan holistik. Buat masa ini, keputusan Jemaah Menteri sebelum ini dikekalkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN LARRY SOON @ LARRY SNG WEI  
SHIEN [ JULAU ]**

**TARIKH JAWAB : 19 NOVEMBER 2020 [ KHAMIS ]**

**SOALAN**

Minta **MENTERI PERUMAHAN DAN KERAJAAN TEMPATAN** menyatakan bilangan rumah panjang di Sarawak yang mempunyai polisi insurans kebakaran menurut kawasan parlimen dan usaha Kementerian untuk menggalakkan setiap rumah panjang di Sarawak mempunyai polisi insurans kebakaran.

**JAWAPAN**

Tuan Yang di-Pertua,

1. Untuk makluman Ahli Yang Berhormat, Kementerian Perumahan dan Kerajaan Tempatan (KPKT) melalui Jabatan Bomba dan Penyelamat Malaysia (JBPM) sentiasa mengambil langkah proaktif dengan mengadakan program kesedaran awam bersama penghuni-penghuni rumah panjang yang terdapat di Negeri Sarawak terutamanya melibatkan aspek keselamatan kebakaran.

2. Pada masa kini, terdapat satu program perlindungan insuran melibatkan rumah panjang yang diperkenalkan oleh *Allianz General Insurance Company* (Malaysia) Berhad atau dikenali sebagai *Allianz*. Pelan perlindungan yang diberi nama '**KampungKu**' ini menawarkan pampasan sebanyak **RM10,000.00 (bagi mangsa kebakaran, banjir atau ribut)** dan faedah bantuan sebanyak **RM1,000.00 (bagi**

**kemalangan diri)** dengan hanya bayaran RM75.00 setahun untuk setiap unit rumah panjang.

3. Berdasarkan statistik yang diperolehi daripada *Allianz*, kini terdapat sebanyak 49 buah rumah panjang yang telah mempunyai polisi insuran tersebut merangkumi kawasan Sibu, Bintulu dan Miri. Untuk makluman Yang Berhormat, program insuran 'KampungKu' ini adalah inisiatif secara sukarela penghuni-penghuni rumah panjang itu sendiri untuk melanggan pelan yang ditawarkan dan juga salah satu syarat atau keperluan daripada pihak *Housing Development Corporation (HDC)* Sarawak bagi penghuni yang ingin membuat pinjaman untuk tujuan membina semula rumah panjang.

4. Oleh yang demikian, KPKT melalui JBPM berhasrat untuk mengadakan sesi libat urus bersama Persatuan Insurans Am Malaysia (PIAM) bagi membincangkan berkaitan polisi insuran kebakaran seperti ini kerana ia merupakan alternatif yang baik untuk membantu kelangsungan hidup penghuni rumah panjang sekiranya berlaku kebakaran.

5. Selain itu, program kesedaran awam seperti ceramah, program latihan pemadaman kebakaran (*Summer Camp*) melibatkan ketua rumah panjang dan program kempen keselamatan kebakaran (*outreach*) ke kawasan pedalaman akan diperkasakan serta menjadi *platform* untuk JBPM menghebahkan tentang kepentingan polisi insuran terhadap rumah-rumah panjang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : TUAN KARUPAIYA A/L MUTUSAMI  
[PADANG SERAI]**

**TARIKH : 19 NOVEMBER 2020 (KHAMIS)**

**SOALAN**

**TUAN KARUPAIYA A/L MUTUSAMI [ PADANG SERAI ]** minta **MENTERI KEWANGAN** menyatakan perancangan Kerajaan dalam melanjutkan moratorium pinjaman secara automatik sehingga pandemik ini kembali reda atau pemilikan vaksin telah berlaku.

**JAWAPAN**

Tuan Yang di-Pertua,

1. Kerajaan telah memberikan moratorium automatik antara April hingga September 2020 ke atas pinjaman bank selama 6 bulan sebagai sebahagian langkah Pakej Rangsangan Ekonomi Prihatin Rakyat (atau PRIHATIN) untuk membantu meringankan beban rakyat dan perniagaan.
2. Seperti yang telah diumumkan dalam laporan LAKSANA, nilai yang dianggarkan untuk moratorium 6-bulan berjumlah kira-kira RM100 bilion, dengan kira-kira RM35 bilion kepada PKS dan RM65 bilion kepada peminjam individu. Seramai 7.7 juta peminjam individu dan 243,000 PKS yang telah menikmati kemudahan ini.
3. Untuk program Moratorium Lanjutan dan Bantuan Bank Bersasar yang bermula Oktober 2020, sekitar 650,000 permohonan untuk bantuan bayaran balik pinjaman telah diterima dengan kadar kelulusan sebanyak 98%. Daripada permohonan yang diluluskan:
  - a) 40% telah memohon pelanjutan moratorium. Mereka terdiri terutamanya daripada individu yang baru sahaja kehilangan pekerjaan serta perniagaan dalam sektor yang mungkin masih mengalami kekangan operasi yang ketara akibat pandemik; dan
  - b) 60% telah memilih pengurangan bayaran ansuran bulanan. Mereka terdiri terutamanya daripada peminjam yang pendapatannya telah berkurang.

**Tuan Yang di-Pertua,**

4. Selain itu, ekoran daripada gelombang ketiga COVID-19 baru-baru ini, Kerajaan telah mengumumkan dalam Belanjawan 2021 bahawa bantuan bayaran balik pinjaman bersasar akan terus dilanjutkan kepada

golongan B40 yang juga merupakan penerima Bantuan Prihatin Rakyat dan perusahaan mikro dengan pinjaman berjumlah sehingga RM150,000.

5. Peminjam dari golongan B40 diberi pilihan sama ada menangguhkan bayaran balik pinjaman selama tiga bulan atau mengurangkan bayaran ansuran bulanan mereka sebanyak 50% dalam enam bulan bermula Disember 2020. Kelulusan diberikan secara automatik setelah mereka menyatakan pilihan mereka kepada bank. Peminjam yang memerlukan bantuan hanya perlu memaklumkan kepada bank masing-masing melalui pelbagai saluran mudah yang telah disediakan seperti perbankan internet, secara dalam talian atau menerusi Agensi Kaunseling dan Pengurusan Kredit (AKPK). Bagi penerima Bantuan Prihatin Nasional M40 yang memohon pengurangan ansuran mereka, bank juga telah bersetuju untuk menerima perisytiharan sendiri pengurangan pendapatan yang dialami akibat pandemik.

6. Dengan bank terus meluluskan hampir kesemua permohonan bantuan bayaran balik pinjaman, Kerajaan ingin menekankan bahawa bantuan bayaran balik pinjaman terus disediakan kepada mereka yang terjejas. Mereka hanya perlu menghubungi bank masing-masing.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN CHOW KON YEOW [TANJONG]**

**TARIKH : 19 NOVEMBER 2020 (KHAMIS)**

**SOALAN**

**TUAN CHOW KON YEOW [ TANJONG ]** minta **MENTERI KEWANGAN** menyatakan apakah polisi dan spesifikasi Kerajaan Pusat terhadap pelaksanaan proses *Request for Proposal* (RFP) membabitkan projek-projek yang telah dan bakal dilaksanakan. Perincian dengan contoh-contoh sedia ada membabitkan pihak Kementerian.



**JAWAPAN**

Tuan Yang di-Pertua,

Peraturan perolehan semasa menetapkan bahawa perolehan melalui kaedah tender *Request for Proposal* (RFP) adalah dibenarkan bagi projek bekalan/ perkhidmatan *Information and Communication Technology* (ICT) atau pembinaan fizikal yang kompleks di mana spesifikasi projek yang komprehensif dan terkini tidak dapat dikenalpasti dan memerlukan input atau cadangan daripada industri berdasarkan skop projek.

Untuk melaksanakan RFP, Kementerian/Agensi perlu jelas tentang matlamat, visi dan fungsi projek yang hendak dilaksanakan bagi membantu syarikat menyediakan cadangan penyelesaian.

Sebagai contoh, perolehan bekalan/perkhidmatan ICT yang telah dilaksanakan secara RFP adalah projek Sistem Imigresen Bersepadu di bawah Jabatan Imigresen Malaysia (JIM), Kementerian Dalam Negeri (KDN).

Manakala bagi projek pembinaan fizikal yang telah dilaksanakan secara RFP adalah projek pembinaan hospital di bawah Jabatan Kerja Raya (JKR).

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : TUAN KHOO POAY TIONG [KOTA MELAKA]**

**TARIKH : 19 NOVEMBER 2020 (KHAMIS)**

**SOALAN**

**TUAN KHOO POAY TIONG [ KOTA MELAKA ]** minta **MENTERI KEWANGAN** menyatakan:-

- (a) mengapakah program mySalam sebelum ini dibuka pendaftaran untuk golongan M40 walaupun ada isu perundangan yang timbul; dan
- (b) apakah status penyelesaian isu perundangan tersebut dan apakah langkah-langkah lain yang telah diambil untuk memperluaskan peliputan mySalam.

**JAWAPAN**

Tuan Yang di-Pertua,

Sebagaimana Yang Berhormat sedia maklum, Peluasan program mySalam kepada kumpulan M40 telah diumumkan di dalam ucapan Belanjawan tahun 2020. Walau bagaimanapun, wabak COVID19 telah mula merebak di Malaysia pada bulan Januari dan memuncak pada bulan Mac 2020. Berikutan itu, Kerajaan telah memutuskan supaya manfaat skim mySalam dipanjangkan kepada kumpulan B40 yang telah dijangkiti COVID19 dan mereka yang dikuarantin sebagai pesakit di bawah siasatan (PUI) melalui inisiatif di bawah Pakej Rangsangan Ekonomi (PRIHATIN). Usaha untuk meningkatkan kesedaran golongan B40 juga akan ditingkatkan dan akan meningkatkan bayaran kepada pesakit untuk tahun 2020 berbanding tahun 2019. Pada masa yang sama, Surat Ikatan Amanah mySalam telah disediakan dengan menetapkan bahawa manfaat dikhususkan untuk kumpulan B40.

Peningkatan ketara telah dapat dilihat daripada statistik program mySalam semasa di mana bagi tahun 2019, jumlah tuntutan yang telah diluluskan adalah sebanyak 8,034 tuntutan. Setakat 31 Oktober 2020, mySalam telah membayar tuntutan berkaitan hospitalisasi dan penyakit kritikal sebanyak 64 juta ringgit kepada 56 ribu pesakit. Di samping itu, 19 ribu individu telah menerima pampasan berjumlah 11 juta ringgit disebabkan COVID-19.

Bagi memastikan kebajikan golongan B40 terus terpelihara, Kerajaan melalui Belanjawan 2021 menambah baik program mySalam dengan perluasan perlindungan bagi merangkumi tuntutan kos peranti perubatan seperti *stent* dan prostesis.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN AKMAL NASRULLAH BIN MOHD.  
NASIR [JOHOR BAHRU]**

**TARIKH : 19 NOVEMBER 2020 (KHAMIS)**

**SOALAN**

Minta **MENTERI PENGAJIAN TINGGI** menyatakan adakah terdapat sebarang pengecualian bayaran perkhidmatan universiti seperti asrama, perpustakaan dan rekreasi yang tidak digunakan mahasiswa memandangkan pendekatan pembelajaran atas talian dengan mengurangkan jumlah bayaran yuran yang ditanggung mahasiswa.

**JAWAPAN**

**Tuan Yang di-Pertua,**

Kementerian amat prihatin dan mengambil berat terhadap keperluan para pelajar IPT untuk menjelaskan yuran pengajian mereka. Untuk makluman Ahli Yang Berhormat, secara amnya, pelajar di universiti awam (UA) hanya membayar dua (2) hingga 10 peratus sahaja daripada kos sebenar program akademik manakala 90 hingga 98 peratus kos yuran pengajian dibiayai melalui subsidi oleh Kerajaan. Sebagai contoh, purata yuran bagi pengajian Sarjana Muda Perubatan di UA yang perlu dibayar oleh pelajar ialah sebanyak RM10,046 setahun iaitu bersamaan dua (2) peratus daripada kos keseluruhan sebenar pengajian yang berjumlah RM451,929. Manakala bakinya, sebanyak RM441,883 dibiayai oleh subsidi Kerajaan.

Kementerian telah membuat rundingan dengan pihak Kementerian Kewangan Malaysia (MOF) bagi mengurangkan bebanan kewangan pelajar. Sebagai tanda keprihatinan, Kerajaan telah bersetuju untuk mengurangkan kadar yuran asrama dan yuran aktiviti atau perkhidmatan UA sehingga 15 peratus setelah mengambil kira keupayaan kewangan Kerajaan dan UA. Pengurangan yuran tersebut adalah bagi Semester Kedua Sesi Akademik 2019/2020 untuk pelajar warganegara Malaysia. Pengurangan yuran ini akan melibatkan peruntukan sebanyak RM72 juta yang mana RM20 juta merupakan peruntukan tambahan Kerajaan dan RM52 juta menggunakan sumber dalaman UA. Seramai 523,318 pelajar UA di seluruh negara dijangka mendapat manfaat daripada keputusan ini.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : TUAN GOBIND SINGH DEO [ PUCHONG ]**

**TARIKH : 19 NOVEMBER 2020 (KHAMIS)**

**SOALAN**

**TUAN GOBIND SINGH DEO [ PUCHONG ]** minta **MENTERI KOMUNIKASI DAN MULTIMEDIA** menyatakan sama ada harga internet akan dikurangkan lagi dalam masa terdekat dan apakah tindakan diambil untuk memastikan perkhidmatan internet di negara ini berkualiti baik.

**JAWAPAN**

**Tuan Yang Dipertua,**

Untuk makluman Ahli Yang Berhormat, kadar pakej jalur lebar tetap, jalur lebar tanpa wayar dan jalur lebar mudah alih ditentukan oleh faktor-faktor pasaran, perlindungan pengguna dan keadaan ekonomi semasa. Persaingan secara sihat di kalangan penyedia perkhidmatan komunikasi di Malaysia mewujudkan ekosistem industri telekomunikasi yang lebih mampan dan dapat memberikan faedah terbaik kepada rakyat. Walau bagaimanapun, pihak Suruhanjaya Komunikasi dan Multimedia (SKMM) sentiasa memantau harga untuk pakej jalur lebar tetap dan jalur lebar mudah alih prabayar dan pascabayar bagi menjaga kebajikan rakyat di seluruh negara termasuk di kawasan luar bandar.

Pada masa kini terdapat syarikat penyedia perkhidmatan yang menawarkan pakej paling asas dengan kelajuan 30Mbps hingga 100Mbps pada harga RM79 hingga RM99 bagi perkhidmatan jalur lebar

tetap berkelajuan tinggi. Perkhidmatan jalur lebar talian tetap adalah berbeza dengan perkhidmatan mudah alih di mana data boleh dikongsi oleh semua pengguna isi rumah. Menurut laporan Jabatan Perangkaan Malaysia, purata isi rumah untuk tahun 2019 adalah seramai 4 orang. Ini bermaksud harga jalur lebar talian tetap untuk setiap pengguna isi rumah adalah serendah **66 sen sehari**.

Manakala, harga pakej perkhidmatan mudah alih di Malaysia adalah kompetitif kerana terdapat pelbagai pakej dan perkhidmatan nilai tambah yang ditawarkan. Harga pakej asas jalur lebar mudah alih prabayar adalah di antara RM9 hingga RM30 sebulan, manakala harga pakej asas jalur lebar mudah alih pascabayar adalah antara RM8 hingga RM38 sebulan. Secara asasnya, pengguna boleh menikmati perkhidmatan jalur lebar mudah alih dengan harga serendah **27 sen sehari**. Pada masa ini, pembekal perkhidmatan mudah alih utama menawarkan sehingga 30GB sebulan secara percuma (1GB data harian) mulai 1 April 2020 hingga 31 Disember 2020.

Dengan adanya pelbagai pelan yang ditawarkan pada kadar harga mengikut kemampuan, pengguna bukan sahaja boleh memilih pemberi perkhidmatan mereka, malahan dengan adanya *Mobile Number Portability*, pengguna boleh menukar pemberi perkhidmatan mereka dengan mudah untuk mendapatkan pakej yang lebih kompetitif.

Untuk makluman Ahli Yang Berhormat juga, Pelan Jalinan Digital Negara (JENDELA) yang pada 29 Ogos lalu adalah satu inisiatif oleh Kerajaan dan pemain industri untuk mempertingkatkan tahap kesalinghubungan serta kualiti pengalaman perkhidmatan komunikasi di seluruh negara melalui pembangunan infrastruktur yang mampan dan menyeluruh bagi memastikan permintaan rakyat dapat dipenuhi.

Bagi memastikan JENDELA mencapai matlamat yang dikehendaki, sejumlah pelaburan perlu dibelanjakan. JENDELA dianggarkan menelan belanja sebanyak RM21 bilion bagi pelaksanaannya. Kos ini adalah termasuk 55% daripada pembiayaan secara komersial manakala selebihnya daripada Kumpulan Wang

Pemberian Perkhidmatan Sejagat ("PPS") ataupun *Universal Service Provision Fund (USP Fund)*.

Fasa pertama JENDELA merangkumi peluasan liputan jalur lebar mudah alih 4G yang lebih menyeluruh daripada 91.8% ke 96.9% di kawasan berpenduduk, meningkatkan kelajuan jalur lebar mudah alih daripada 25Mbps kepada 35Mbps dan pertambahan bilangan premis daripada 4.95 juta kepada 7.5 juta premis yang mempunyai akses kepada kelajuan gigabit untuk perkhidmatan jalur lebar talian tetap menjelang 2022.



**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB TUAN LARRY SOON @ LARRY SNG  
WEI SHIEN [ JULAU ]**

**TARIKH : 19 NOVEMBER 2020 (KHAMIS)**

**SOALAN**

**TUAN LARRY SOON @ LARRY SNG WEI SHIEN [ JULAU ]** minta **MENTERI KOMUNIKASI DAN MULTIMEDIA** menyatakan langkah-langkah yang dilaksanakan oleh Kementerian untuk mengatasi masalah ketidakstabilan liputan internet dan telekomunikasi di kawasan pedalaman Sarawak yang diakibatkan penggunaan rangkaian satelit dan bekalan janakuasa diesel.

**JAWAPAN**

**Tuan Yang di-Pertua,**

Untuk makluman Ahli Yang Berhormat, Kementerian sentiasa memberi tumpuan kepada penambahbaikan infrastruktur komunikasi melalui penyediaan liputan jalur lebar berkelajuan tinggi dengan menggunakan pelbagai teknologi. Ini adalah untuk membolehkan rakyat di kawasan pedalaman termasuklah di negeri Sarawak dapat menikmati akses kepada perkhidmatan jalur lebar berkelajuan tinggi yang lebih menyeluruh.

Penggunaan bekalan janakuasa diesel pula diperlukan bagi memastikan alat pemancar komunikasi di menara berkenaan dapat beroperasi kerana ketiadaan bekalan elektrik yang kekal. Namun, penggunaan janakuasa diesel lebih terdedah kepada kecurian dan

vandalisma yang juga turut mempengaruhi kestabilan perkhidmatan yang disediakan.

Pihak penyedia perkhidmatan juga bekerjasama dengan pemilik tanah dan Jawatankuasa Keselamatan Kampung bagi mengurangkan risiko kecurian dan vandalisma. Bagi menyediakan perkhidmatan yang lebih stabil, pihak penyedia perkhidmatan akan menaik taraf menara kepada penggunaan tenaga elektrik kekal sekiranya lokasi berkenaan telah tersedia dengan liputan tenaga elektrik pada masa hadapan.

Untuk menyediakan liputan di kawasan luar bandar dan pedalaman, pelbagai cabaran dihadapi oleh pihak Kerajaan termasuklah menentukan jenis teknologi yang bersesuaian, keadaan geografi dan bentuk muka bumi kawasan yang hendak diberikan perkhidmatan di samping ketiadaan bekalan kuasa yang kekal.

Faktor lokasi yang agak jauh di pedalaman juga menyebabkan hanya teknologi satelit sahaja yang boleh digunakan sebagai alat pemancar komunikasi di menara bagi membolehkan liputan jalur lebar mudah alih dapat disediakan di kawasan pedalaman berbanding dengan penggunaan rangkaian gentian optik dan pemancar gelombang mikro yang lebih stabil dan laju.

Pihak penyedia perkhidmatan akan menaik taraf menara berkenaan kepada teknologi gentian optik atau gelombang mikro secara berperingkat seiring dengan pembangunan dan ketersediaan rangkaian gentian optik atau gelombang mikro di kawasan berkenaan.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**  
**DARIPADA : TUAN M.KULASEGARAN [IPOH BARAT]**  
**TARIKH : 19 NOVEMBER 2020 (KHAMIS)**

**SOALAN**

Minta **MENTERI PENGAJIAN TINGGI** menyatakan jumlah graduan yang terjejas peluang mendapatkan pekerjaan selepas tamat pengajian akibat impak daripada COVID-19.

**JAWAPAN**

**Tuan Yang di-Pertua,**

Kementerian amat prihatin dan mengambil berat terhadap nasib graduan yang terjejas peluang untuk mendapatkan pekerjaan akibat kesan pandemik COVID-19 yang melanda negara. Adalah dianggarkan pada tahun 2020, sejumlah 300,000 graduan bakal menamatkan pengajian masing-masing. Daripada jumlah tersebut, kementerian mengunjurkan sebanyak 25 peratus atau 75,000 graduan yang mungkin akan terjejas peluang mendapat pekerjaan dalam tempoh enam (6) bulan selepas menamatkan pengajian.

Dalam memastikan kebolehpasaran graduan ditingkatkan terutamanya pasca pandemik COVID-19, sejumlah RM100 juta telah diperuntukkan melalui inisiatif PENJANA kepada Kementerian Pengajian Tinggi (KPT) untuk melaksanakan Program PENJANA KPT-CAP. Program-program yang berbentuk latihan kemahiran jangka pendek dan sederhana ini dijangka dapat memberikan manfaat dan nilai tambah kepada sejumlah 20,000 graduan universiti awam, politeknik dan kolej komuniti.

Kementerian dengan kerjasama pihak TEKUN Nasional turut memperkenalkan Skim Pembiayaan Mikro dengan peruntukan sebanyak RM20 juta bagi membantu mahasiswa mengembang dan meningkatkan perniagaan masing-masing. Inisiatif ini disasarkan dapat membantu sekurang-kurangnya 20,000 orang peserta. Pihak PUNB pula akan membiayai program keusahawanan berkonsepkan mentor-mentee untuk membolehkan bimbingan secara langsung daripada usahawan-usahawan yang telah berjaya. Program ini dijangka akan memberi manfaat kepada sekurang-kurangnya 500 orang pelajar.

Kementerian turut melaksanakan program padanan pekerjaan kepada graduan dengan kerjasama PERKESO. Graduan-graduan yang berdaftar di *Portal Graduates Reference Hub for Employment and Training* atau ringkasnya GREaT yang diselia oleh KPT akan dipadankan dengan kekosongan jawatan di syarikat-syarikat yang berdaftar melalui portal MyFutureJobs di bawah seliaan PERKESO.

Selain itu, bantuan kewangan juga ditawarkan kepada mereka yang ingin melanjutkan pengajian ke peringkat yang lebih tinggi. Antara inisiatif tersebut adalah seperti MyBrain Science dan Biasiswa Menteri Pengajian Tinggi. Dalam usaha mempelbagaikan lagi sumber pembiayaan kewangan kepada pelajar, kementerian turut berkerjasama rapat dengan Yayasan Tenaga Nasional bagi menyediakan pembiayaan kewangan kepada pelajar yang berkecayaan melalui program *My Brighter Future (MyBF)*.

Sekian, terima kasih.

**PEMBERITAHUAN PERTANYAAN DEWAN RAKYAT MALAYSIA  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : DATUK MOHAMADDIN BIN KETAPI  
[LAHAD DATU]**

**TARIKH : 19 NOVEMBER 2020 (KHAMIS)**

**SOALAN**

minta **MENTERI PEMBANGUNAN LUAR BANDAR** menyatakan projek jalan kampung, projek bekalan air luar bandar (BALB) dan projek elektrik Luar Bandar (BELB) di Parlimen Lahad Datu yang telah dilaksana dan akan dilaksanakan dari tahun 2018 hingga 2020.

**JAWAPAN**

**Tuan Yang di-Pertua,**

Untuk makluman Yang Berhormat, sepanjang pelaksanaan Projek Bekalan Elektrik Luar Bandar (BELB) dari tahun 2018 hingga 2020 terdapat satu (1) projek yang kini sedang dilaksanakan di Parlimen Lahad Datu iaitu di Kampung Sabahan di bawah pelaksanaan Projek Bekalan Elektrik Luar Bandar (BELB) Sambungan Talian Grid Zon 2 Negeri Sabah Tahun 2017-2018. Projek di Kampung Sabahan dengan kos sebanyak RM3.92 juta ini bakal memberi manfaat kepada 29 buah rumah dan dijangka siap pada Ogos 2022.

Bagi pelaksanaan Projek Bekalan Air Luar Bandar (BALB), Kementerian ini sedang melaksanakan lima (5) buah projek di Parlimen Lahad Datu dengan kos diluluskan sebanyak RM230.1 juta yang akan memberi manfaat kepada 4,878 buah rumah. Projek-projek tersebut adalah:

- i. Projek BALB Di Kawasan Dewata, Lahad Datu, Sabah (RM22 juta) – Peringkat Pembinaan;
- ii. Projek BALB Sistem Retikulasi Negeri Sabah Zon 8 – Daerah Lahad Datu (RM9 juta) – Peringkat Lantikan Perunding;
- iii. Projek Loji Rawatan Air Sri Putatan dan Sistem Rangkaian Paip Sekitarnya, Lahad Datu, Sabah (RM167.6 juta) – Peringkat Rekabentuk;
- iv. Projek BALB Kg. Bangingod, Kg. Sri Hak dan Kg. Telibas, Tungku, Lahad Datu, Sabah (RM17.5 juta) Peringkat Penyediaan Dokumen Tender;
- v. Projek BALB Sistem Retikulasi Tahun 2018/2019 Negeri Sabah – Bahagian Lahad Datu (RM14 juta) – Peringkat Rekabentuk.

Bagi Projek Jalan Perhubungan Desa (JPD) pula sebanyak 54 projek berjumlah RM11.63 juta telah diluluskan oleh pihak Kementerian bagi tujuan pelaksanaan dari tahun 2018 hingga 2020. Setakat 25 Oktober 2020, 46 daripada projek tersebut telah siap sepenuhnya manakala lapan (8) lagi projek sedang di peringkat pelaksanaan.

Sekian, terima kasih.

**PEMBERITAHUAN PERTANYAAN DEWAN RAKYAT MALAYSIA  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : PUAN ISNARAISSAH MUNIRAH MAJILIS  
[ KOTA BELUD ]**

**TARIKH : 19 NOVEMBER 2020 (KHAMIS)**

**SOALAN**

minta **MENTERI PEMBANGUNAN LUAR BANDAR** menyatakan status jalan-jalan raya utama kampung-kampung Talungan-Terintidon-Sayap, Kampung Podos-Pinolobuh-Mengkulat, Kampung Gendukut-Tengkurus-Lahanas Kota Belud. Jalan-jalan ini adalah jalan utama masuk ke kampung dan sudah tersenarai dalam RMK-11 yang lalu.

**JAWAPAN**

**Tuan Yang di-Pertua,**

Untuk maklumat Yang Berhormat, cadangan jalan Kampung Gendukut-Tengkurus-Lahanas telah diluluskan di bawah Projek Naiktaraf Jalan Tengkurus Lahanas Siba-Lahanas Sokib, Kota Belud, Sabah. Projek ini telah diluluskan di bawah Rancangan Malaysia Kesebelas *Rolling Plan* Keempat (RMKe-11, RP4) Tahun 2020 dengan kos sebanyak RM57.0 juta dan skop naiktaraf jalan sepanjang 10.0 km dengan spesifikasi JKR R1. Status terkini adalah di peringkat penentuan skop dan kerja awalan.

Manakala bagi cadangan jalan kampung Talungan-Terintidon-Sayap merupakan jajaran di bawah cadangan Projek Naiktaraf Jalan Sayap, Kota Belud, Sabah. Kementerian telah mengangkat permohonan projek tersebut bagi pelaksanaan di bawah Rancangan Malaysia Kedua Belas (RMKe-12). Status terkini adalah di peringkat

pertimbangan kelulusan Unit Perancang Ekonomi, Jabatan Perdana Menteri.

Bagi cadangan jalan Kampung Podos-Pinolobuh-Mengkulat, jajaran ini terletak di jajaran cadangan Projek Naiktaraf Jalan Gaur Mengkulat, Kota Belud, Sabah dan Projek Naiktaraf Jalan Gaur Pinolobuh, Kota Belud Sabah. Kedua-dua projek telah tersenarai di bawah Senarai Keutamaan Kerajaan Negeri dan akan diangkat bagi kelulusan RMKe-12 *Rolling Plan* seterusnya. Walau bagaimanapun, kelulusan adalah tertakluk kepada kelulusan oleh pihak Unit Perancang Ekonomi, Jabatan Perdana Menteri (UPE, JPM) dan kedudukan semasa kewangan kerajaan.

Sekian, terima kasih.



**PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB PUAN WONG SHU QI [KLUANG]**

**TARIKH : 19 NOVEMBER 2020 (KHAMIS)**

**SOALAN**

**PUAN WONG SHU QI [KLUANG]** minta **MENTERI PERDAGANGAN ANTARABANGSA DAN INDUSTRI** menyatakan jumlah permohonan Geran Automasi Pintar yang telah diterima serta permohonan dan geran yang telah diluluskan mengikut sektor.

**JAWAPAN**

**Tuan Yang di-Pertua,**

Untuk makluman Ahli Yang Berhormat, Kementerian melalui Malaysia *Digital Economy Corporation* (MDEC) telah diberi peruntukan sebanyak RM10 juta daripada jumlah RM100 juta bagi tahun 2020 untuk mengurus Geran Automasi Pintar atau *Smart Automation Grant* (SAG) di bawah PENJANA.

Geran Automasi Pintar yang diuruskan oleh MDEC ini merupakan bantuan kewangan dan bentuk geran padanan untuk syarikat-syarikat perkhidmatan mengautomasikan proses dan operasi perniagaan mereka dengan penggunaan teknologi digital. Inisiatif ini bertujuan untuk menggalakkan syarikat tempatan memanfaatkan teknologi digital untuk meningkatkan produktiviti serta mengurangkan kos operasi dan kebergantungan kepada proses manual. Mekanisme pelaksanaan Geran ini melibatkan kerjasama institusi kewangan dan rakan industri seperti syarikat telekomunikasi dan pakar industri.

**NO SOALAN : 48**

Sehingga 15 Oktober 2020, sebanyak 430 jumlah permohonan yang telah diterima. Daripada jumlah ini, 61 permohonan telah selesai diproses dan 369 permohonan masih dalam proses penilaian. Daripada jumlah permohonan yang telah diproses, sebanyak 29 permohonan telah diluluskan yang melibatkan jumlah keseluruhan geran yang diluluskan sebanyak RM3.13 juta.

Berikut adalah pecahan jumlah geran yang diluluskan mengikut sektor:

<b>No</b>	<b>Sektor</b>	<b>Geran diluluskan (RM)</b>	<b>Peratusan mengikut sektor</b>
1	Perdagangan borong dan runcit	1,014,053.00	32.4%
2	Aktiviti pentadbiran dan perkhidmatan sokongan	491,734.00	15.7%
3	Aktiviti penginapan dan perkhidmatan makanan	399,886.00	12.8%
4	Aktiviti kewangan dan insuran	269,666.00	8.6%
5	Aktiviti kesihatan dan kerja sosial	226,666.00	7.3%
6	Aktiviti profesional, saintifik dan teknikal	210,008.00	6.7%
7	Aktiviti perkhidmatan lain	141,900.00	4.5%
8	Pembinaan	125,272.00	4.0%
9	Aktiviti harta tanah	133,333.00	4.3%
10	Maklumat dan komunikasi	116,666.00	3.7%
	<b>Jumlah Geran Yang Diluluskan</b>	<b>3,129,184.00</b>	

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' SERI DR. SHAHIDAN BIN KASSIM  
[ARAU]**

**TARIKH : 19 NOVEMBER 2020 (KHAMIS)**

**SOALAN**

**DATO' SERI DR. SHAHIDAN BIN KASSIM [ ARAU ]** minta **MENTERI KEWANGAN** menyatakan adakah pihak Kerajaan sedar bahawa krisis pandemik COVID-19 bukan sahaja memberikan implikasi terhadap masalah kesihatan bahkan turut memberi impak negatif terhadap ekonomi di seluruh dunia. Apakah mekanisme untuk mengatasi impak negatif terhadap ekonomi negara, apakah unjuran pertumbuhan ekonomi bagi tahun hadapan dan bilakah keadaan ekonomi negara dijangka pulih sepenuhnya.

**JAWAPAN**

**Tuan Yang di-Pertua,**

1. Impak penularan pandemik COVID-19 bukan sahaja memberi implikasi terhadap kesihatan malahan turut juga memberi kesan terhadap pertumbuhan ekonomi global. Berdasarkan unjuran Tabung Kewangan Antarabangsa atau IMF, kemelesetan ekonomi dunia berikutan situasi ketegangan perdagangan dan ketidaktentuan harga komoditi yang diburukkan lagi dengan penularan pandemik COVID-19 merupakan krisis yang paling genting sejak era *the Great Depression* pada tahun 1930an. Lebih 150 negara termasuk Malaysia dijangka merekodkan penguncupan ekonomi pada tahun ini.

2. Sebagai sebuah ekonomi terbuka, negara turut sama terjejas dengan perkembangan ini. Keluaran Dalam Negara Kasar (KDNK) negara telah mencatatkan penguncupan sebanyak 8.3 peratus bagi tempoh separuh pertama 2020. Penyusutan ini juga disebabkan oleh langkah pembendungan yang ketat bagi mengawal penularan pandemik COVID-19 sama ada di peringkat global mahupun domestik. Langkah kawalan dalam negara perlu dilaksanakan bagi tujuan untuk menyelamatkan nyawa dan melindungi kehidupan rakyat, sungguhpun Kerajaan menyedari impak pelaksanaan Perintah Kawalan Pergerakan (PKP) dalam pelbagai fasa tersebut ke atas ekonomi negara.

**Tuan Yang di-Pertua,**

3. Susulan daripada penularan pandemik dan langkah PKP tersebut, Kerajaan telah bertindak proaktif dengan melaksanakan pelbagai pakej rangsangan ekonomi bernilai RM305 bilion bagi memastikan kebajikan rakyat terus terjamin dan pada masa yang sama menggerakkan semula ekonomi. Kerajaan menggunakan pendekatan strategi 6 fasa atau “6R” seperti berikut:

- a. Pertama, **Ketegasan atau Resolve** dalam mengawal Covid-19 dengan melaksanakan Perintah Kawalan Pergerakan (PKP);
- b. Kedua, **Ketahanan atau Resilient** melalui pakej Rangsangan ekonomi PRIHATIN dan PRIHATIN PKS Tambahan untuk meningkatkan mutu perkhidmatan kesihatan, kemampuan rakyat dan ekonomi;
- c. Ketiga, **Memulakan semula atau Restart** ekonomi secara teratur dan terkawal dengan mengamalkan prosedur operasi standard (SOP) yang ditetapkan;
- d. Keempat, **Pemulihan atau Recovery** ekonomi dengan memperkenalkan pakej rangsangan Pelan Jana Semula Ekonomi (PENJANA);

- e. Kelima, **Memperkasa** atau **Revitalize** ekonomi secara menyeluruh melalui Belanjawan 2021; dan
- f. Keenam, **Menyusun semula** atau **Reform** struktur ekonomi untuk kita melangkah ke era kebiasaan baharu menerusi penyediaan Rancangan Malaysia Kedua Belas 2021 – 2025 (RMKe-12).

4. Fasa ke-5 dan ke-6 dalam strategi 6R ini akan memberi tumpuan dalam memulihkan pertumbuhan ekonomi pada 2021. Belanjawan 2021 yang telah dibentangkan di Parlimen pada 6 November 2020 lalu merupakan strategi fasa ke-5 iaitu untuk Memperkasa (*Revitalise*). Ia masih bertumpu kepada matlamat menentukan kesejahteraan rakyat dan kelangsungan perniagaan memandangkan kesan pandemik COVID-19 dijangka akan berlanjutan ke tahun 2021. Belanjawan 2021 juga memberi fokus kepada ketahanan ekonomi bagi meletakkan asas pada pertumbuhan jangka sederhana termasuk kelestarian pertumbuhan, pemboleh teknologi dan kualiti perkhidmatan awam. Pelbagai inisiatif dan strategi yang dirangka menunjukkan komitmen Kerajaan untuk merangsang semula pertumbuhan ekonomi pasca krisis COVID-19.

**Tuan Yang di-Pertua,**

5. Bagi mengatasi impak negatif pandemik ke atas ekonomi, Kerajaan telah melaksanakan belanjawan berkembang menentang kitaran, atau *counter-cyclical expansionary budget* dengan izin, bagi menampung kejatuhan permintaan dalam dan luar negeri. Kerajaan akan menumpu kepada perbelanjaan dengan pengganda tinggi seperti RM2.5 bilion peruntukan kepada kontraktor kelas G1 hingga G4 bagi menjalankan projek kecil dan sederhana di seluruh negara. Sejumlah RM50 juta juga telah diperuntukkan sebagai akses pembiayaan kepada kontraktor pembinaan di bawah Skim Pembiayaan Kontrak Ekspres atau SpiKE.

6. Di samping itu, pembangunan infrastruktur pengangkutan akan diteruskan dengan sejumlah RM15 bilion disediakan bagi membiayai antaranya projek Lebuhraya Pan Borneo, Landasan Berkembar Elektrik

Gemas – Johor Bahru, Landasan Berkembar Lembah Klang Fasa Pertama, *Mass Rapid Transit* 3 atau MRT3 dan *High Speed Rail* atau HSR. Beberapa projek baharu berjumlah RM3.8 bilion turut akan membantu menjana pertumbuhan seperti Projek Fasa 2 bagi pembinaan Jambatan Klang Ke-3 di Selangor, Projek *Central Spine Road* di jajaran baharu di negeri Kelantan dan Pahang, menaik taraf jambatan merentasi Sungai Marang di Terengganu, Projek Fasa 3 bagi membina dan menaik taraf lingkaran Pulau Indah, Klang, Selangor, pembinaan Lebuhraya Pan Borneo Sabah bagi pakej dari Serusop ke Pituru dan menaik taraf Jalan Persekutuan menghubungkan Gerik, Perak ke Kulim, Kedah dan Projek Jalan Pintasan Cameron Highlands, Pahang dengan penekanan langkah pemuliharaan alam sekitar. Ini belum termasuk projek pembangunan di lima koridor wilayah yang akan diteruskan dengan peruntukan sejumlah RM780 juta.

**Tuan Yang di-Pertua,**

7. Pelan pemulihan ekonomi seterusnya ialah fasa ke-6 iaitu Menyusun Semula (*Reform*) yang merupakan pelan jangka masa sederhana di bawah Rancangan Malaysia Kedua Belas, 2021 – 2025. RMKe-12 yang dijangka akan dibentangkan pada awal tahun hadapan sedang dirangka dengan mengadakan libat urus bersama semua pihak berkepentingan bagi memastikan pertumbuhan yang berkualiti, inklusif dan mampan. RMKe-12 bermatlamat untuk membolehkan ekonomi dipulihkan sepenuhnya serta memastikan kesejahteraan rakyat dapat ditingkatkan dan kekayaan negara dapat dikongsi bersama.

**Tuan Yang di-Pertua,**

8. Pemulihan dalam ekonomi negara dapat dilihat melalui pertumbuhan KDNK bulanan yang bertambah baik. Berdasarkan anggaran KDNK bulanan, prestasi pada bulan Julai menyusut lebih baik pada 2.7 peratus. Manakala, bulan Ogos sebanyak negatif 3.6 peratus dan bulan September sebanyak negatif 1.6 peratus. Sementara itu, pertumbuhan KDNK pada suku tahun ketiga 2020 mencatatkan penyusutan lebih kecil sebanyak 2.7

peratus berbanding negatif 17.1 peratus pada suku tahun kedua 2020. Ini selari dengan sektor ekonomi yang telah kembali beroperasi sejak fasa Perintah Kawalan Pergerakan Pemulihan bermula 10 Jun 2020. Secara keseluruhan, ekonomi Malaysia bagi 2020 dianggar menguncup antara 4.5 peratus hingga 5.5 peratus sebelum kembali pulih dan berkembang antara 6.5 peratus hingga 7.5 peratus pada 2021.

9. Unjuran ini selari dengan Tabung Kewangan Antarabangsa yang mengunjurkan pertumbuhan dunia kembali pulih kepada 5.2 peratus pada 2021 selepas mencatat penyusutan 4.4 peratus pada 2020. Pemulihan ekonomi negara sepenuhnya juga bergantung kepada tempoh pandemik ini akan berakhir dengan pelbagai aspek perlu diambil kira dari segi kebolehdapatan vaksin COVID-19, perubahan landskap ekonomi dan perdagangan global; penurunan bilangan kes jangkitan COVID-19; keyakinan pelabur dan pelancong; dan keberkesanan langkah ransangan ekonomi.

10. Kerajaan sentiasa komited untuk memperteguh asas ekonomi negara, memulihkan keyakinan rakyat dan pelabur termasuk memperkukuh pengurusan fiskal dan mempelbagaikan sumber pendapatan negara demi memacu pertumbuhan ekonomi masa hadapan. Melangkah ke hadapan, Kerajaan akan terus memperkemas dan melaksanakan pelbagai inisiatif untuk meningkatkan kualiti hidup rakyat serta memacu pertumbuhan ekonomi.

Sekian, terima kasih.